




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

MATI 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Lotu Faamanatu o le Maa o le Tusi Paia

Na amata i le aso 30 Iuni 2013, le Lotu Faamanatu o le *silasila itulau e 2*

Droozhba, emir
silasila itulau e 10

I Tafatafa o le Tuugamau Tuufua na tali atu ai Maria: "Raponi e!"

silasila itulau e 18

In My Heart There Rings a Melody

silasila itulau e 8

Pe a oo ina savalivali mai le alofa

silasila itulau e 17

Na Vaetamaina A'u

(O se tala mo ulugalii talavou)

Ua oo i le taimi matou te momoe ai i lea afaifi.

silasila itulau e 9



O le vaaiga fou lea ua iai le Papa o Misi i nei ona po, le Maa o le Tusi Paia i luma, ma le malumalu ua toe faafouina, i Avao i le mea na faaliliuina ai le Tusi Paia i le Gagana Samoa.

“Aua ne’i ia te i matou, le Alii e, aua ne’i ia te i matou” Sal. 15:1

Viliamu Uilipafosi ma le soloia o le faatauina o tagata e fai ma pologa

E 26 tausaga o Viliamu Uilipafosi (William faaauau itulau e 19)

E Onomea ona avea Tama’ita’i ma Faifeau? -

silasila itulau e 11

Lotu Faamanatu o le Maa o le Tusi Paia

Maa o le Tusi Paia, i le EFKS i Avao i Savaii. O le 153 ai foi lea o tausaga talu ona uma ma mae'a atoatoa le galuega o le faaliliuina o le Tusi Paia, i le 1860.

Ua faavaeina lenei Lotu Faamanatu e saga faatauina ai e lenei aulotu ma le lotu faafetai i le Atua lenei galuega. Aua o ai na manatu e tusi aao le Atua, ma filifilia lenei nuu ma lona laueleele ma ona tagata, e faia lana galuega sili ona pa'ia, o le uluai faaliliuina lea o lana Tusi Paia i le gagana Samoa.

Ua faafaigofie ai ona malamalama tagata Samoa uma i lana Tala Lelei ma lona finagalo pa'ia. Le galuega lea, lele ua tofu Tusi Paia uma ai Samoa, ua le gata i le EFKS, ae faapea foi i isi Ekalesia Kerisiano i Samoa ma le lalolagi.

Ae o se toe tepa tasi lenei i tua i le sauniga o le Faapaiaina o le Uluai Maa o le Tusi Paia, Avao, Matautu, 27 ma le 28 o Iuni 1945, e pei ona faamauina i le Sulu Samoa Aokuso 1945.

O le Maa Faamanatu o le Tusi Paia Samoa i Avao, Matautu - Itu o Tane - Savaii, 27, 28 Iuni 1945
Saunia e Kenape Tu'u'au Faleto'ese

Ua vivii a'e le agaga, ua silia i le selau tausaga, na liliu ma tatala mai le Itu o Tama, o le Tusi o le Faaolataga.

Aso Lulu 27 Iuni 1945: Ua fesilafai fiafia le fanau a le Tusi Paia, ua usu potopoto, ma ua nofoia le Gaga'emauga, i le ifo

a nafa. O Sato'alepai na faagaaga mo le 'au misionare ma a'oga tetele. Ua iai Malua, Papauta, Leulumoega Fou, Maluafou ma o latou matai, atoa ma le Ofisa o le Teutupe. E feagai ia ma Sale'aula, Lealatele ma Sato'alepai. Na alaala i Fagamalo ma Lelepa o Toeaina ma Faifeau, o alii tiakono ma e avea ma sui o Matagaluega e fa mai ia Upolu - Malua, Apia, Falealili ma Aana. Na feagai ia ma le Pulega a le Gagaifomauga. O Avao sa alaala ai le Matagaluega a Faasaleleaga, na feagai ma le nuu oloo tu ai le Maa, ma le Pulega a le Itu Asau.

Se mea a mamalu ma le matagofie o le alofa maopopo! O le tofa mamalu ma le utaga pototo a le au faatuatua. E le gata i uiga ma upu, ae atoa foi ma le malos. Viia le puna.

Aso Tofi 28 Iuni 1945 - O le aso lea o le sauniga pa'ia i le 8am. Ua amata le solo mamalu mata fiafia, lanu pa'epa'e, ma isi togiga kola mumu, na ta'ita'iina e le faaili a Fagamalo. Na afua le solo i Sato'alepai, ma tuluia pea pe a taunuu atu i Fagamalo ma Lelepa, se'ia taunuu atu i Fagamalo, se'ia taunuu i faitotoa e ulufale ai i Avao, a ua faapenei ona tulaga: Muamua le faaili sa pepese malie i laasaga o le olioli o pese a e o a'e. Pito iai le 'Au Toeaina ma Faifeau. Sa faatasi le alii Leoleo ma le 'au faigaluega ua avea ma sui o le Ekalesia Metotisi. O alii tiakono ma le Ekalesia. O Komiti a Tamaitai

ma A'oga tetele, Malua, Leulumoega Fou, ma Papauta. A ua talimau mai le Matagaluega a Faasaleleaga ma le vaega o le Itu o Tane i Avao, oloo tula'i fa'a'afa li'o i le itu i gagaifo o le Maa oloo pulou i le Fu'a o le LMS. Na taunuu le solo, ua fa'a'atoa le li'o i luga o le "Papa o Misi" ua si'omia ai le Maa. Ua ta mai pa'o e tolu o le logo, ona maninoa lava lea o le filemu, ua tula'i le gaoia tagata uma, ma ao ua taufai punou ifo, e aunoa ma se leo, oloo i mafaufauga pa'ia i minute e lua, peiseai ua siitia ai le potopotoga i se tulaga e matua maualuga lava.

Ua mavae lea, ona la'ala'a a'e ai lea o le Ta'ita'ifono talu ai, Elisara FT, ma tula'i mai i lona fa o sitepu o le Faavae o le Maa, ua pa'u mai saunoaga mamalu e faapenei: "Ua faatuina lenei Maa e le Matagaluega a le Itu o Tane mo le Ekalesia e fai ma faamanatu o le liliuina o le Afioga a le Atua i le Gagana Samoa. Sa faia lea galuega e alii Misionare Sosaiete ma e na fesoasoani iai, i lenei lava fanua ua faatuina ai le Maa. Ma ua tatou laulaututu ai i le aso nei. Ua tatou potopoto mai e faapaiaina lenei galuega i le Suafa o le Tolu Tasi Pa'ia."

O Tavita Roma, le ta'ita'i tufuga na atiinaa'e le Maa, na ia tatala ese le fu'a sa ufitia ai le Maa. Ona fai ai lea o le tatalo e le Ta'ita'i. Sa taina le pese a le faaili, a o ulufafo atu le faapotopotoga i le fale launiu sa toina e pipii atu i le fale vali oloo totoe ai pea le potu sa fai ma ofisa e faaliliuina ai le Tusi Paia. Ua laitiiti le fale, e lei ofi le potopotoga e tusa ma le lima

faaauau itulau e 5

Lauga Aso Sa o Tupulaga 2014

F.Tuai:Kenese 1:1 – 5

F. Fou:Mataio 5:1 – 12

Matua:Mataio 5:1 – 2a,

“Ua silasila atu ia i le motu o tagata, ona maliu a’e lea o ia i le mauga; ua nofo i lalo, ona o mai ai lea o ona soo ia te ia; ua ia fetalai atu, ma a’oa’o ia te i latou: Amuia.”

Manatu Autu: O UPU MO E LEAI SE MALOSI.

Ua amata nei le faitauga o le lauga a lesu i luga o le mauga, se’ia aulia le tau o Puapuaga. O le vaega muamua leni o le Lauga, sa tatou faitauina, e ta’ua o le Fa’a’amuia. A o le lauga atoa, o loo faamau i le Mataio mataupu 5 – 7. O le lauga ua fa’amauina, o le Lauga Silisili. Le lauga na fausia ai lauga a nisi ta’ita’i lauiloa, ma tula’i mai ai suiga tetele faale sa’olotoga, i le tala faasolopito o le lalolagi.

Na fausia ai le lauga a Matini Luteru Kini (Martin Luther King) lana lauga ta’uta’ua, ‘E i ai La’u Miti’ i le 50 tausaga talu ai. O le lauga na lagaina le pologa o tagata uli i Amerika, na maua ai lo latou aiâ tatau, aiâ tutusa ma tagata sisina, ma le saolotoga mai faiga faailoga lanu ma faiga faapologa.

Na fausia ai lauga a Mahatma Ghandi o Initia, ia aveese le mativa, faasa’oloto tagata mai tu ma aganu’u faailoga tagata, faasa’oloto mai le pulea e Peretania, ma faafealofani

tapuaiga ese’ese i totonu o Initia.

O la’u taofi, o le lauga leni, na faaosofia ai foi Mandela o Aferika i Saute, aemaise le ta’ita’i o le atunuu, Tupua Tamasese Lealofi le 3, i lona ta’ita’iina o le Mau mo se sa’olotoga o le mâtô Samoa mai ia Niu Sila.

O le faiga masani lea o lauga i le lalolagi a Mataio. O le failauga, e ta’ita’i le au faalogologo i nofoaga ta’alaelae ma le maupuepue, ina ia ofi tagata uma, ia manino ma lagona lelei le mataupu e fia laugaina.

Peitai e i ai le uiga faapitoa o fia faamalamalama muamua e Mataio, ae lei tolaulauina le lauga. I lona ta’ua o le motu o tagata, o lona afio a’e, o le mauga, o lona silasila atu ma lana fetalai atu. *“Ua silasila atu ia i le motu o tagata, ona maliu a’e lea o ia i le mauga.”*

O ai le motu o tagata, ae o le a le mauga?

O le motu o tagata lutaia, o tagata faa-Feagaiga Tuai poo le Isaraelu Tuai. Tagata o lona nuu ma lana tapuaiga lutaia. Ae o tagata foi, e pei lava o tatou, pe a fua i le soifuaga o tatou ola ai nei, i lo tatou faasinomaga faa-Samoa.

O tagata e i ai a latou tu ma aganuu . Aganuu faa-lutaia, faapea foi tu ma aganuu faale-tapuaiga. O aganuu e i ai ona sa ma ona faigâ, e i ai ona paia ma

ona mamalu, e mai le vavau e oo i le faavavau, e le soona tautala i ai se tagata. O aganuu e taofiofi mamau. E le ta’u seseina, e le fesiligia. O le aganuu e faalogo mulimai ia muamai. O aganuu ua faia lava e tagata, ua faapaia ma fai ane, o tu ma aga mai le Atua.

O tagata e ui ina iloa le mamafa ma le pologa o le faatinoga o nei tu ma aga, e le amiotonu, e le alofa, e faapaupau, e fete’ena’i ma le finagalo o le Atua, ae ua ola ai pea. E ui ina oi, ona e manuia ai na o se vaega itiiti, o ositaulaga, o faresaio ma tusiupu, ae faigata, o le olaga ua latou fananau ma tutupu ae ai. E faigata e malosi le so’otaga toto ma aano, i le faale-aiga, faale-nuu, faale-tapuaiga.

Ma o tagata e foliga mai o loo manuia i le tino, i le vaai atu i fafo, a o totonu o loto ma agaga, o loo taavili ai le tu’ufesili ma le le maotonu. E manino luga, ao lalo o loo nefu ai le olopalaina, puapuagatia, taotaomia. O le motu o tagata e leai se malosi.

O le motu o tagata o loo ola i le soifuaga tausi tulafono. O tulafono e 10 a Mose, ma isi tulafono faaopopo, o faatonutonu ai le ola o aso taitasi. E faasino ma pulea e mataitusi o le tulafono, mea e taga ma mea e sa. O tulafono ua tapui ai soo se vaipanoa, ia le *faaauau itulau e 4*

Lauga Aso Sa o Tupulaga 2014

toe migoi, ua leai se sa'olotoga, e tusa ma le aiâ faatagata soifua.

O le motu o tagata, o loo ola i lalo o le pule a isi faigâ malo. O le taimi lea o pulea lutaia e Roma; a o lo latou tala faasolo, sa pulea foi e Metai ma Peresia, Papelonia ma Asuria. A tala i tua i lo latou amataga mai, o Aikupito, o le mea sa nofo pologa ai.

O le motu o tagata e toilalo faalemalo. E ui ina o lo latou laueleele, latou aiga ma nuu moni. E ui ina i ai o latou ta'ita'i faalotoifale, a o le upu moni, o loo pulea e malo malolosi, le malosi o a latou tupe, le malosi o au'upega, ma pulega faafitafita.

E leai se sa'olotoga e faaali atu ai se manatu ma se lagona. E le mafai ona latou finau pe faatuie'se. E tuu i vaimata pe a faaali se tete'e; e amo le sala, e afaina ma le aiga. E tulimatai se mea e maua ai. O tagata o loo tagi le fatu ma le eleele, fia maua se sa'olotoga moni.

O le motu o tagata o loo tapuai i le Atua. O le Atua e afio i mauga, i le mea maualuga. O le nofoaga e paia, e sa ma tapu mo le Atua.

E tele mauga, auâ o laufanua ia o Palesitina. E tele foi mea tâua o le talaaga o Isaraelu na tutupu ai. Ma e leai se mea o lilo i mafaufau o le motu o tagata. E pei o le Mauga o Sinai. Le mauga na afio ifo ai le Atua, na fetalai mai ai ia Mose. Na

aumai ai tulafono, na osi ai le feagaiga. O le nofoaga o le pule ma le faatonuga, o le malosi ma le amiotonu faatulafono.

Faapei foi o le mauga o Siona, le mauga o tu ai le malumalu i Ierusalem. O le mauga o loo i ai le maota, ma le nofoalii, ma ua taua o le aai a Tavita, o le aai tau tupu. O le mauga o tu ai le malumalu, e afio ai le Alii le Atua. Ua avea Siona ma igoa e faamatala ai le fesoota'iga vavalalata a Isaraelu, ma le Alii lo latou Atua. E faatusa i ai tagata e mautu le faatuatua i le Alii, e faapei o le mauga o Siona i latou.

Mulimuli ane ona faasuafa lea ma faalupe le aai o Ierusalem, o le tama fafine a Siona. O le igoa e ta'u mai ai lagona o'otia o le tiga ma le faanoanoa, ina ua faatafunaiina le 'a'ai. O le mauga o loimata ma auega. Ua fai fatuga, o taulagiga ma muâgagana, e faaleo ai le masiasi ma le toilalo popo. *"Na fetagisi ai lava i matou, ina ua matou manatua Siona."*

Ua faalototele perofeta, ma latou valo'ia, o iinei lava i Siona, e faataunuu ai le aso o le Alii. O Siona e tulai mai ai lo latou tupu ma le Mesia, na te faia lo latou faolataga. E pei ona fai ane Sakaria, *"Ia e matuâ fiafia oe le tama fafine a Siona... faauta o le a alu atu lou tupu ia te oe, o ia le amiotonu ma le faaola, e agamalu o ia, o loo tietie i le asini."*

O lona uiga, o le motu o tagata o mulimuli nei ia Iesu i luga o le mauga, o loo tumu i avega mamafa o tau amo. E tofu ma se to'atuga, se faafitauli. E tofu ma faamoemoega, o naunautaiga. Ua lailoa i le fia mapu. Ua fia maua se tali. O le fesili o laugatasia ai i latou uma. O le aso ea lenei? O ia ea lenei o tatou faatali i ai? O se lauga ea lenei, e tali ai o tatou mana'oga?

"Ua silasila atu o ia i le motu o tagata.. ua ia fetalai atu." Ua silasila ma ua fetalai. O le faamatalaina la o le Atua i le foafoaga, i le ulua'i mauga o Etena. Na silasila le Atua i le foafoaga, i le ulua'i mauga o Etena. Na silasila le Atua i le gaogao ma le so'ona nunumi, i le pouliuli o le leai o se mea, leai se uiga, leai se ola. Ua la fetalai atu, *"Ia malamalama."* Ona malamalama lea. Na faaolo le foafoaga, ma faai'u i lona fetalai, *"Ina tatou faia ia le tagata i lo tatou fatusa, ia foliga ia i tatou."* Na silasila, faauta ua matua lelei lava."

O le mau a Mataio e tusa ma lana gagana, o le Atua na faia le lagi ma le lalolagi, lea ua lauga nei i luga o le mauga. O le Mataisau, o le Silafaga, o le Upu Fetalai a le Atua. A o le Atua foi lea o tapua'i i ai lutaia. Le Atua o Aperaamo, o Isaako ma

silasila itulau e 15

Lotu Faamanatu o le Maa o le Tusi Paia

mai le itulau e 2

afe. Ua alaala Elisara FT i le nofoa o le Ta'ita'i. O le sauniga o pese malie, ma upu filifilia mai le Tusi Paia e feagai ma lena aso. O talosaga o le agaga fia tapuai ma le faamaoni. O lauga taua, ma le lagona o le mafutaga ma Le na fetalai: "O se mea tou te potopoto ai i lo'u igoa, ou te iai faatasi ma outou."

O le pese a le Itu o Tane na fatuina e faatatau tonu i le sauniga ma le tala i le galuega tau Tusi Paia. Sa ta'ua suafa o e na galulue ai: Misi Parate, Mala'itai Leuatea, Maiava, Leota Penitala, Laupu'e Agaimalo, Malietoa Talavou, Vaelua Petaia.

Faitau le Tusi Paia: Mose FS. Tatalo: Suasua FT, Efaraimo FT. Pese: Lelepa. Lauga 1: Elisara FT: "E te faia e oe mea sili, ma e malo pea lava." Lauga 2: Ta'ele FT: "Faavae....Faailoga". Lauga: Sopoaga FT: "E fai lenei aso ma faamanatuga ia te outou." Pese 354 - A'oga tetele. Lauga 3: Timo L.M. "O a'u o le Malamalama o le lalolagi." "Ia outou fealofani." Lauga 4: Tamati FT: "Ia e faamalosi ma ia tatou faamalolosi." Lauga 5: Sio FT: "O Tusi Paia uma lava e mai le Agaga o le Atua ia." "Faiga o le Tusi Paia.....Tusi Paia Samoa." Lauga 6: Tupe FT: "Faafetai". Pese 144 - faaili. Tatalo faai'u e le Ta'ita'i.

2pm: Faafiafia i Sato'alepai. Taalolo le Matagaluega Le Itu o Tane. O meaalofo o tanoa fai'ava, tootoo ma siapo. Taalolo Gaga'emauga, e tusa

ma le 1000 lbs pisupo.

Lauga: Tua'i'au'afa'i (Saleaula); Fata Tamati (Afega); Tiatia (Matautu). Pese: Satoalepai, Vaipouli, Fagamalo, Leulumoega Fou. Lauga: Tupe FT - foa'i meaalofo ma faasoa le keke. Lauga: Elisara FT - o le faafetai.

O se tasi lenei o molimau tusitusia o lea aso i Avao, na tusia e Sopoaga FT:

Na latou aumai se mea lelei, a ua aveesea ai le tele o mea aoga.

O le upu lea a le tasi alii ta'uta'ua o Initia. Pe se upu muimui 'ea pe faameo? O le manatu tafatasi i le itu faaletino, a ua itiiti i le itu sili faaleagaga. O le mafua ona tautala lenei tagata ona o le tele o tupe ua foa'i atu e Initia Kerisiano i le Sosaiete (LMS: Lonetona Misionare Sosaiete) i faiga taulaga. Na avatu e le Sosaiete le Lotu Kerisiano i Initia - "o le mea lelei", a ua fai ma mea ua alu ai le tele o mea aoga. E le taumate ua sese le alii lea.

Talofa e ia le Itu o Tane! Toeaina, Faifeau, Tiakono, Tamalii, Failauga, ma le Matagaluega atoa. Ua tele lo outou mafatia ona o le alofa ma le agalelei ua faaaliga, o le mata fiafia ma le loto fesoasoani. Ua matua uiga ese le matagofie o outou uiga faa-Keriso, e pei o le matagofie o outou nuu ma aai, ua faapea o outou foliga. O e na faato'a vaaia o outou nuu, ua latou lagona le ofo ma le loto

faafetai ona o faaaliga o le mamalu ma le maopoopo o le Malo o le Atua i le Itu o Tane.

Ua faapea foi i le Faasaleleaga. Faafetai i le taliga o le gasolosolo mai, na selefutia outou i le tafe o le vai i nisi itu o le Ekalesia na ui ane ai. E pei ona maua le gagana sa'o a Samoa i Savaii na lolomi ai le Tusi Paia, ua faapea ona mua outou i taliga malo - e faa-papalagi ma faa-Samoa. Ua taunuu ai le isi upu fiafia: "Ua matou fo'i ma le uta ua goto."

O le Matagofie o le Sauniga

Na oo ifo i mea tuloto i totonu o le loto le olioli ona o le mataupu na ala ai lenei sauniga. "O le faaliliuina lea o le Tusi Paia i la tatou gagana." Ua tumu le loto i le faafetai ona o e na punonou ifo i lea galuega aoga. Amuia o tatou mata ua vaai, ma o tatou taliga ua faalogo i le agaga o lea aso. O ai na faia lenei galuega? E pei ona viia i latou na liliuina ae sili ona viia le ua na faa-aoga le Tusi Paia i lona olaga. Feinu tatou i le puna o le ola ua i totonu o le Tusi Paia. E leai se upu oi le Tusi Paia na tusia fua, pe faamatalafuaina; aua e le o le loto o le tagata na tusia, ae sa tusia e tagata paia o le Atua anamua ina ua osofaia mai e le Agaga Paia (2 Peteru 1: 21).

A o fiafia foi latou! Manaia taalolo ma popese. Ua su'i fefiloi le aso 'ula nai Avao ma Sato'alepai, ae nuunuu mea uma ma molilaaui i Fogaa. Viia le Atua ma le Malo filemu e ona nei sauniga. E le tiao pepese le nofo a Matagaluega ma A'oga tetele - "Faafetai le fita! Faafetai galue!" E pei na fai lo matou o atu ma mea na outou

faaauau itulau e 6

MATINI LUTERU

1483 - 1546

O le Auupega o le Toe Fuata'i

I aso nei, 'a 'e matua vaai toto'a lava iai, o le a e mate'ia uiga moni lava o talitonu iai le 'au faatuatua. O tagata oloo faafalepuiiina e lagona faalotu, oloo latou taumafai ai ina ia latou maua le faamagaloga mai le Atua e ala i lo latou totogiina lea o a latou agasala i fua o a latou galuega. E mafai foi ona aliali mai i nisi tagata oloo latou faamamafa lo latou tuuina atu lea o latou e auai i le tele o galuega a le Ekalesia ina ia talileleiina ai latou e ta'ita'i o le lotu. O tagata ia e latou te talia le popotua ma le faamalo mai o ta'ita'i. A latou ausia lea laasaga,

ona latou manatu ai lea, ua talia foi latou e le Atua. E manatu foi latou o lo latou to'a'aga e auai i faamanatuga tusa lava poo le a le faigata ona fai, e maua mai ai le faamalieina o o latou lotu i lo latou va ma le Atua. E le mamafa ia i latou lo latou tapua'i i le Atua faatasi ma isi o le 'au faatuatua, e pei ona tatau ai, ae mamafa ia i latou lo latou galulue e faamalieina le Atua ia latou galuega fai. E manatu latou, o a latou galuega, e mafai ona totogiina ai a latou agasala. E oo lava foi i nei ona po, oloo faaauau pea nisi o mea sa

fai i le 1500 tausaga ua mavae, o le ta'uta'u lea o agasala i le faifeau, ma tutu se moliga'o. O ni mea oloo fai pea ina ia maua mai ai le faamagaloga o agasala.

I aso o Matini Luteru, sa taumafai le Ekalesia e faatupuina i tagata le fiafia i mea tau le Atua ma atili faatoateleina ai tagata lolotu. O le mafuaaga lea na latou amata ai ona faamagaloina agasala a se tagata pe a asiasi i nofoaga pa'ia, aemaise lava i Roma, ma matamata i ni mea mai aso ua mavae, e pei o tupe siliva na faatauina ai e Iuta ia lona Alii o Iesu; faapea ma le suasusu faapea na aumai le fatafata o Maria le Taupou.

A mae'a ona asiasi o se tagata i ia mea o ta'ua i luga, ona fai ai lea e le pope o se faamagaloga o agasala, e faavae i luga o mea ua vaai pe asiasi iai se tagata. O se faaaoaoga, o le matamata i tupe siliva na maua e Iuta le Sekala, o le a avea ma mea e ave'esea ai le 1,400 tausaga mai le faasalaga i pulekatolio.

O nisi o nofoaga e sili ona taua atu i lo isi, e pei o Roma lea sa tumu i le tele o mea mai Ierusalem a le tausaga e 70 talu ona fanau mai le Alii, e pei o le faasitepu o Ponetio Pilato, ma le tulaga sa tula'i ai le Alii Faola i le taimi o lona faamasinoga a o le'i faasatauroina. E tele lava maka poo togi o le tagata e maua pe a vaavaai iai i le mea lea ona o le tulaga na tula'i ai le Alii. Peitai e le na o le vaavaai iai i le tulaga, ae ia savali ai i luga o sitepu e 28 ma fai lana tatalo i le Atua i sitepu ta'itasi. O le savaliga e tasi i luga o faasitepu ia e 28, ua lava lava ona togi e maua ai e se tagata o le aiga ua oti ma ua i pulekatolio, le saolotoga e tuua ai pulekatolio.

O Roma foi lea e faapea na tanu ai Paulo ma Peteru. Fai mai na ta'i vaeluaina i la'ua e ta'ita'i o le lotu, ma tufa atu i ni aulotu se fa ina ia

Lotu Faamanatu Maa o le Tusi Paia

faaauau mai le itulau e 5

fiafia tele ai! A ua fai foi lea ma mea ua aveese ai le tele o a outou mea aoga. E ui i lea ua faatauavaa le tiga ona o Keriso na fetalai: "O a'u lea ua outou faia iai."

O le toe manatu: O le mamalu o le Atua! Ua sao le sauniga, e leai se mala ua tupu ona ua auai le Atua. O aso sa louloua, a ua avanoa lelei ala. Ua tuua ma viiga o le Atua. Ua vaaia le mamalu ma le mana o le Atua, a o matou ui ane i le lava. O! O se vaaiga uiga ese ma le mata'utia i galuega a le Silisiliese. Sa lagona ni manatu se fa: (1) O le ofo ma le mata'u i le Atua. (2) O le salamo i agasala o se faatamala. (3) O le

faatuatua. (4) Le nofo sauni i le toe afio mai o Iesu. A ea?

Si o tatou soona fai e fai nei i le olaga talauula, ma le faatalatu! Soia le faagalogo le Atua, ae faasili ou manatu i mea a le olaga. A vaai i le tele o le mea ua ufitia i le lava, ua faapea ifo ai - ua lava lea lauga ou te talitonu ai i le mamalu o Ieova o 'au.

Faafetai i le Atua ina ua uma ona tatou faia se mea lelei. Tofa eva! E le faatofaina le po masina, aua tatou te toe feiloai i se aso.

O se Tala mai Avao i le Taimi nei

O le fono a le aulotu EFKS i Avao i le Aso Sa 2 Iuni 2013, e uiga i le faavaeina o se Lotu Faamanatu o le Tusi Paia, na autasi ai le faifeau ma le aulotu, ia faatino loa lenei faamoemoe taua, ua leva ona tatau ona

silasila itulau e 14

silasila itulau e sosoo ai

MATINI LUTERU

tele ai ni aulotu e manuia ai i mea e maua mai le faamagaloga o agasala. E to'a 40 pope, ma maturo e 76,000 oloo tanuina i Roma, ma o le asiasi atu i ia tuugamau e maua ai ou togi e faaopoopo i lau faaputuga togi mo lou faamagaloga. E iai foi se isi aulotu e faapea oloo ia latou le laau faakoluse na nofo Iuta le Sekala ma sisi ai ia.

O Roma la, o le aai lea e te alu iai pe a e manao e faamalieina le Atua. O le mea lea, i le tausaga e 1510, na matua fiafia lava Matini Luteru ina ua tofia o ia faatasi ma se isi sui o le latou aulotu, e talanoaina ma le pope se mataupu o fe'ese'esea'i ai le latou aulotu, na matua fiafia lava o ia aua o le a oo ai i le mea o tele ai mataaga o tuugamau ma isi mea tau le lotu i Roma, o le mea e maua mai ai ou togi e faaputupu mo le faamagaloga o au agasala. Ina ua taunuu o ia i Roma, ona nofo lea o ia i le nofoaga o le Ituaiga o Aukusitino, tatalo ai i taimi faatulagaina mo talosaga, tapuaiga, ma le ta'uta'uina o agasala. A o ona taimi avanoa, e asiasi ai o ia i nofoaga ia e fai ma mataaga e maua mai ai togi ona o lou oo iai. E le gata ona e maua mai ai togi e faaitiitia ai le faasalaga i pulekatolio, ae e faatuputeleina ai foi lona fiafia i mataupu tau i le Atua. O le vai taimi lea o valivaliina ai e le valiata ta'uta'ua o Michaelangelo le fa'alo o le falesa o le Sistine Chapel, le ata, (painting) ua lauiloa nei e le lalolagi. Ae na sili ia Matini Luteru lona fia vaai i le ata valivali (painting) o le Taupou o Maria, lea fai mai na valivaliina e le aposetolo o Luka.

Ae e le'i fiafia o ia i lona nofo ai i Roma, ma lona matauina o uiga faasamasamanoa o faifeau, le tatope o a latou misasa, e tasi lana misasa e fai a ua oo i le fitu misasa

a le isi faifeau i le taimi lava lea e tasi. Na matua faanoanoa lava o ia i lona faalogo atu o faapea le musumusu a le isi faifeau i lana faiga o le faamanatuga: 'O oe o le areto, ma e tumau pea lou avea ma areto; o oe o le uaina, ma e tumau pea lou avea ma uaina!' E ofo o ia i le le 'ano'ano o le faifeau i mea pa'ia! Ae le'i faaitiitia ai lona talitonu i le sauniga pa'ia o le faamanatuga, ma faifeau faamaoni i le mea o galue ai.

Ae na amata ai i lea vai taimi ona oo mai ia te ia masalosologa. O le mea moni, o le taimi o iai o ia i le faasitepu o Pilato na amata ai ona ia fesiligina nisi o mataupu o le lotu. Sa tootuli o ia i faasitepu ta'itasi ma fai ana tatalo. Na mafaufau foi o ia a na faapea ua oti uma ona matua, manu ua mafai ona ia faasaolotoina mai i la'ua mai pulekatolio a o iai o ia i Roma. Ua manatu o ia, o le mea e na o se taaloga. O ai e iai tonu le pule? E faapefea ona ia mautinoa o lana malaga i Roma o le a faamalieina ai le Atua? E faapefea ona ia iloa ua avea o ia ma uo a le Atua?

Na fo'i mai Roma ia Matini Luteru ma taunuu i Erefuti, e le'i umi ae siitia o ia i Uitenipeka i Siamani lava, i le nofoaga o le Ituaiga o Aukusitino. Na ave o ia iina ina ia faiaoga ai i le Iunivesite. O Uitenipeka o se aai laitiiti e le tutusa le tele ma Erefuti. Peitai o le taitai o lea vaega o le atunuu, o Feterika le Poto, na naunau o ia ina ia atiinae le Iunivesite i Uitenipeka ina ia avea ma Iunivesite e aupito sili ona lelei i le atunuu.

I Uitenipeka na feiloai atu ai Matini i se alii o le a avea ma ona faufautua, o Ioane o Sitopisi, o se patele na matua faatuatuaina Matini se'ia oo i le iuga. Na 'e'eva mafaufau o patele i Uitenipeka e pei foi o patele i Erefuti, i uiga tuufesilisili o Matini i lea mea ma lea mea e uiga i le Atua ma lana

faamagaloga o agasala. Na malamalama lelei Matini e le mafai ona faamagaloina agasala e aunoa ma le ta'uta'u o agasala i le patele ma salamo, maua mai ai le faamagaloga mai le patele, faaopoopo iai ma ni galuega e tatau ona fai e fesoasoani i le totogiina o agasala. Peitai, na te le manatua le anoano o ana agasala. Na ia malamalama foi, e tatau ona save'u lona mafaufau, ma lona manatua o mea, ina ia folasia ai i le malamalama o le la ana agasala. Ae popole lava Matini ina ne'i te'i ua na le manatua nisi o ana agasala. O le mea lea, e le atoatoa foi la le faiga oloo iai nei e mafai ona faamagaloina ai agasala.

Afai e le mafai e sou lelei, e le mafai e lou asiasi i nofoaga pa'ia, e le mafai foi e lou ta'uta'u o agasala, o le a la le mea a fai? Ua matua faaletonu lava le mafaufau o Matini. Ua popole! Ua oo ina tete ona tino. Fai foi ana miti leaga faafefe tagata i le po.

Ona taumafai lea o Sitopisi e faato'afilemu Matini i se auala e lei faalogo lava iai Matini. O Sitopisi e pei o se tagata pa'ia e mafuta ma le Atua. O tagata ia e talitonu latou oloo faatasi moni mai lava le Atua ia i latou i aso uma. Na tupuga mai ia i latou ia le ituaiga ua ta'ua o monike (monks).

I le tausaga e 300 talu ona fanau mai le Mesia, ina ua pa'u atu i le faale-tagata ma faapaupau uiga o le Ekalesia, ona o ai lea o se vaega o ia tagata Kerisiano i le toafa tuufua, ma nonofo ai ma sailiili i le Atua. Na ta'ua i latou o tagata nofo'ese, nofo toatasi e le filo ma isi tagata e pei ona masani ai, (hermits). I lo latou nofo toatasi, na latou maua ai se mafutaga mafanafana ma lo latou Atua.

Na taumafai Sitopisi e ta'ita'i Matini i le olaga lea o monike. Na faamatala e Sitopisi ia Matini, o le feagai ai ma le natura o tagata i galuega e fai, e tusa lava lea ma le

faaauau itulau e 13

Itulau mo Tupulaga Talavou

In My Heart There Rings a Melody

E logo i tino lagona o le agaga fiafia

Salamo 98: 1, 4 - 8:

“Ia outou pepese atu i le Alii i le pese fou; aua o vavega na na faia.....Ia alalaga i le Alii le lalolagi uma; ia leo tele lava, ma ia alalaga fiafia, ma ia fai pesega. Ia outou fai pesega i le Alii i le kitara; o le kitara ma le leo o le pese. O pu ma le leo o le sofao ia outou alalaga ai i luma o le Alii le Tupu. Ia taalili le sami ma mea ua tumu ai, o le atu laulau ma e o nonofo ai. Ia pati lima vaitafe, ia alalaga faatasi ai mauga ma le fiafia i luma o le Alii.....”

O le Tupu o Solomona, o se tasi o tagata aupito potu lea na soifua mai i le lalolagi nei, na ia faapea ane: “O le loto fiafia e tupu ai mata fiafia; a o le loto faanoanoa e momomo ai le tagata.” - Faataoto 15: 13. Ua leva foi ona lauiloa i galuega faale-soifua maloloina le talitonuga, o tagata e fiafia, o tagata foi ia e soifua maloloina lelei. Ae faapefea ona maua lea fiafia i le loto o le tagata? O le tagata o le Atua e talitonu, e maua mai lea i le ola latalata i le Atua.

E tatau ona aliali mai lea i o tatou olaga taitoatasi i aso fai soo, o se faaa’oa’oga, pe a tatou potopoto i a tatou sauniga lotu. O le tapuaiga moni lava, e faaali mai ai i foliga o le tagata, le fiafia, ae le o le faanoanoa. Fiafia e feiloai atu i le Alii. Fiafia e mafuta atu i le Alii. Fiafia oloo maua le Alii.

Peitai e aliali mai i foliga o le toatele o Kerisiano, o le tapuaiga

ma fati pese iloga, o Elton M. Roth. O le aso sa fesoasoani ai o ia i le tapenaga o se sauniga faa-evagelia i le tausaga e 1923 i Texas i Amerika, na oso mai ai i lona mafaufau ia upu ma le fati o le pese leni. Fai mai o ia, o le afiafi lava lea na ia faapotopoto ai ni tama ma teine pe tusa ma le to’a 200, ma latou usuina le pese leni i se sauniga faa’evagelia sa fai i fafo. Na faaopoopo atu iai le faapotopotoga na auai i lea sauniga, ma latou usu faatasi ma tama ma teine.

A faaali o tatou uiga fiafia, ma mata fiafia ia tatou sauniga lotu, o le a faapea foi ona fia auai tagata ese i mea o tatou fai i luga o lo tatou talitonuga, ma le faatuatua i le Atua o le na faia i tatou.

Kerisiano o se mea e foliga faanoanoa ai, ma ola ai i se olaga saisaitia ma puapuagatia ma e faato’a matuu atu lea avega pe a saofaga atu i le manuia i le lagi. Ae le tatau ona faapea. O le tagata lava ia o savavali faatasi ma le Alii, e aliali mai i ona foliga ma lona olaga, le fiafia ma le olioli.

O le tagata na ia tusia le pese leni: “In My Heart There Rings a Melody”, o se tagata fatu pese

In My Heart There Rings a Melody

I have a song that Jesus gave me,
it was sent from heav’n above;
there never was a sweeter melody,
‘tis a melody of love.

Chorus:

In my heart there rings a melody,
there rings a melody with heaven’s harmony;
in my heart there rings a melody,
there rings a melody of love.

I love the Christ who died on Calv’ry,
for He washed my sins away;
He put within my heart a melody,
and I know it’s there to stay.

‘Twill my endless theme in glory,
with the angels I will sing;
‘twill be a song with glorious harmony,
when the court of heaven ring.

A Page for Youth

Itulau mo Tupulaga Talavou

Na Vaetamaina A'u

Ua oo i le taimi matou te momoe ai i le afiafi. O lona uiga o le a sau fo'i lo'u tina ma fai lelei lo'u 'ie'afu, ma tolotolo mai i luga o lo'u moega ma ta'oto mai ai i o'u tafatafa. E ausulu atu lo'u ulu ma 'ou ta'oto i luga o lona tau'au ma lona tino mafanafana, ae ua tago ua seluselu o'u lauulu i lona lima ma fai mai e ese lona alofa ia a'u. Afai e le o vaivai lo'u tina, o le a ou faalogo foi i le *Tala*, o le *Tala* e fai lava i po uma, a o le'i faia a ma tatalo i le ma momoe ai.

Ou te le fiu lava i faalogologo i le *Tala* e ui lava ina fai soo. O le mafuaaga, ona o le *Tala* e uiga ia a'u. E na o a'u lava le fanau, ma e na vaetamaina a'u. E masani ona amata faapea le tala a lo'u tina, "Sa ma manana'o lava ma lou tama ia maua se ma tama. E tele ni tausaga o ma taumafai lava ia maua se ma pepe. Sa ma tatalo i le Atua, ina ia ou to ia, ma faalogoina i lo'u manava le taufe'a ai o se tamaitiiti. Ae ina ua te'a le tele o tausaga ou te le to, ona ma talitonu ai lea, oloo iai se mea e sili ona lelei oloo fuafuaina e le Atua mo ma'ua. Ua ia filifili o le a ia aumai mo ma'ua se tamaitiiti i se isi auala, o se tamaitiiti e fanau mai e se isi fafine ae na te le mafai ona ia tausia. E finagalo le Atua i ni matua oloo naunau ia maua se la tama, se ulugalii o le a alofa moni i lea tamaitiiti. E te iloa la le tamaitiiti na aumai e le

Atua mo ma'ua ma lou tama? O oe!"

"Mama, faamatala mai le aso na lua maua ai a'u."

Ona faamatala ai lea lo'u tina. "Taki, o le aso aupito sili lea ona ou fiafia ai i lo'u olaga. Na amata i le tatagi o le telefoni, ma le leo o tautala mai ai, "Misi Filimani, lea faato'a fanau lau lua tama! Lua te fia o mai lua te matamata iai?"

"Na ou vili i lou tama i lona ofisa, ona nanati mai ai lea ma le fiafia e ma te o i le falema'i ma te matamata ia oe. Na ma matamata atu i le faamalama i le tele o pepe faato'a fananau, ma ma taumateina pe o fea le pepe mo ma'ua. Ina ua oo atu le ma matamataga i le i'u o le laina o pepe, ona ma iloa atu ai lea o lou igoa o tusi i le moega, a ua e liliu mai ma e 'ata e pei e te iloa ma'ua. Na ou siiina mai oe ma ma o mai loa i lo tatou fale e faafeiloa'i atu oe i o ma aiga ma uo lea ua tumu mai e matamata ma feiloa'i atu ia oe. Na o mai foi o ma aiga ma ni meaalofo mo oe. Ae o ma'ua, o lea ua i o ma lima le ma

meaalofo sili ona taua mai le Atua. O oe. O se mea sili lava lea na ma faia ma lou tama, o le vaetamaina (adopted) mai lea o oe ina ua e fanau mai."

O taimi uma lava e faamatala ai le *Tala* e lo'u tina, e fiafia ai lava. E le fiu e faamatala. Ou te le fiu foi e faalogologo iai. Na manatu o ia, o le la vaetamaina mai o au, o se mea matua lelei lava lea, o se filifiliga taua ua la faia ma lo'u tama, ua mafua ai ona avea o a'u, o se la tama moni lava na fanau mai o la mavana.

Ina ua atoa le fitu masina o la'u to i la'u lava tama, na sau ai lo'u tina e asiasi mai. O le aso lea na ou matua lagona ai le taufe'a o le tamaitiiti i totonu o lo'u manava. Fai mai si o'u tina, "E a? Ua e fiafia i le taufe'a o le pepe i lou manava?" O le taimi lea na pei ai ou te te'i ina ua ou manatua, e le'i faalogoina lava e si o'u tina le taufe'a a se tamaitiiti i lona manava. Ona ou fai atu ai lea iai, "Mama, sau e tuu mai lou lima i luga o lo'u manava ma e faalogologo i le taufe'a a la'u tama. O lau grandchild! (O le tama a lau tama)."

tusia e Alexander Yates ma Allison Yates Gaskin, siitia mai le tala:

"Thanks, Mum, for Everything"

faamatalaina e A.T.A.Aiavao

THE GIVERS & THE RECEIVERS

No person was ever honoured for what he received. Honour has been the reward for what he gave.

The world is full of two kinds of people, the givers and the takers. The takers eat well - but the givers sleep well.

Itulau mo Tupulaga Talavou

“Droozhba, emir!”

“O outou o a matou uo - ia outou manuia!”

O se tasi o a ma uo mamae o Stan Dale. O Stan e fai lana mataupu i le alofa ma le va fealoalofa'i. O ni nai tausaga ua te'a na ia ta'ita'ia ai se vaega o ana tagata a'oga se to'a 29 i se malaga i Rusia mo ni vaiaso se lua. O le sini o lea malaga, o le fia iloa lea uiga moni o tagata o lea atunuu e faataumoa pea ma lo latou atunuu o Amerika. Na ofo lava tagata i tala na ia faamatala mai i ana tusi e uiga i le latou malaga. O se tasi leni o tala na ia tusia oloo lolomi atu i lalo:

A o matou savalivali i se isi aso i le paka i le aai tele o atiinae eseese a lea aai o Karkov, na matou fetau ai ma se fitafita Rusia o le Taua Tele Lonalua a le Lalolagi (1939-1945) ua penisione. E faigofie lava ona iloa fitafita nei, aua e 'ofu lava o latou ofu fitafita, ma faapipii ai i luma o le fatafata o o latou ofu, a latou pine na maua mai le taua. E le o le faalialia e ala ai ona tautau nei pine i o latou ofu, ae o le faatauaina e Rusia o o latou tagata na tau ina ia faasaoina mai Rusia mai le fili. O le taua lea na oo atu ai i le 20 miliona tagata Rusia na malilili i fetauiga ma 'autau a Siamani.

Na ou savali atu ma faafetaui le fitafita lea ma ou fai atu iai, “Droozhba, emir!” Na vaai mai le fitafita ia a'u e pei e le talitonu, ona fai mai ai lea, “Americanski?” Na ou tali atu iai, “Da, Americanski. Droozhba, emir!” Na 'u'u e le fitafita lo'u lima i ona lima e lua, ma lulu e pei o ma'ua o tagata o se 'aiga ua leva ona le feiloa'i. Ona matou talanoa ai lava lea, la'ua i le gagana Rusia, ma

ma'ua ma lo'u toalua i le Igilisi, ma matou talie e pei lava e malamalama isi i tala a isi. O le mea moni, e le tau faamatalaina le uiga o le talie ma talanoa. Na matou fusifusi, maligi loimata, ma fai lava nei upu: “Droozhba, emir. Americanski.” Matou te alolofa ia outou. Ua matou fialia e asiasi mai i lou tou atunuu. Matou te le mananao e fetaua'i o tatou atunuu.”

Ua te'a ni minute ona matou faamavae ai lea ma aga'i atu la matou vaega e to'a fitu i le isi itu o le paka. Pe 15 minute ua te'a, ae te'i ua toe taumulimuli atu le fitafita ia matou. Na tago mai ua taofi a'u, ona tago lea i le pine o le Order of Lenin o pipii i lona fatafata, o se pine matua taua ma le maualuga a Rusia e tuuina atu i se fitafita ona o lona toa ma le le fefe e tau i le taua, ua tatala, ma tago ua faapipii i lo'u fatafata. Ona sosi mai ai lea o ia i o'u alafau, toe tago mai ua fusimau atu a'u ia ia, ma ma fetagisi ai, a o vaai atu mata o le isi i le isi ma faatofa: “Dossvedanya!” Goodbye!

O le tala o i luga o se vaega tele lea o se a'oa'oga na matou maua mai la matou asiasiga i Rusia. O aso uma sa faafeiloa'i ai matou i le alofa ma le agalelei o tagata, mata fialia, ma tausii lelei matou. E le mafai ona galo ia i latou i Rusia, ma matou foi mai Amerika, ia aso o feiloaiga fealofani o tagata lautele, tagatanuu, o Rusia, ma nisi o tagata lautele, tagatanuu, o Amerika. E talitonu lava, o a'oga e tolu na matou asiasi iai, o le a le galo i tamaiti, lo matou fialia faatasi, ma le toe manatu ai, o tagata Amerika o ni tagata e fia

fasioti i tagata Rusia ia latou pomu niukilia. Na matou pepese, sisiva, feasogi ma tufatufa a matou meaalofa. Sa valaauina foi matou ia latou faaipoipoga. Ma matou toe sisiva ai foi, ma pepese, ma inu ia latou meainu malolosi o le vodka ma isi.

I Kursk, e to'atolu aiga na latou ave matou i o latou aiga matou te fai'aiga ai, ma talatalanoa i o matou atunuu o Rusia ma Amerika. Na matou faamavae ma le fialia ae toe faanoanoa foi i lea po. O le mea moni, o lea ua iai a matou uo i Rusia, ma o le a avea o latou aiga ma o matou aiga.

O le po na sosoo ai, na matou fai'aiga ai ma o matou aiga fou i le faletalimalo o matou nonofo ai. E ta le 12 i le po o matou talanoa lava ma sisiva ma pepese fialia. Ma matou 'a'ai ma inu a matou vodka se'ia oo i le taimi matou te faatofa ai. E mafai ona ou faamatalaina atu mea uma na oo ia matou, pe na faia mo matou, ae le mafai ona faamatala o matou lagona fialia, o'otia, faanoanoa ina ua matou faamavae.

O le a sou lagona pe 'a e fo'i atu i lou faletalimalo o tuu mai ai se pepa o tusi ai ni upu i le gagana Rusia, mai le Peresitene o le malo o Rusia o Mikhail Gorbachev, e faaali mai ai lona faanoanoa ona e le mafai ona feiloa'i ia matou ona oloo malaga i se isi aai o Rusia? Peitai, ua uma ona ia faatonuina ni sui se to'aono o le Komiti Tutotonu o le Pulega o le Malo o Rusia, e fai'aiga ma talatalanoa ma matou i le faletalimalo mo ni itula se lua, e talatalanoa ai i mataupu eseese tau ia Amerika ma Rusia, faapea ma faafitauli o tupulaga talavou i atunuu e lua.

O le a sou manatu pe a e vaai atu i ni loomatutua, poo ni grandmothers, babushkas, se to'a sefululua, ua savavali mai i lalo o lo latou fale, o 'ofuina o latou 'ofu totoaso ma fefete ma felefelea, ua oo mai ma fusifusi atu matou ma sosi mai

faaauau itulau e sosooai

E onomea ona avea Tama'ita'i ma Faifeau?

O lea ua faatu uto le sa'ena ua mua atu ua mua mai ua tau le 'ai e pei o le faiva i fogavai. Ua tatou pisipisi pasapasa tonini tonana ua tatou umufono talatala fialia i luma o le Atua i leni taeao matagofie. Ave la'ia le viiga ia te ia aua ua tataua lava lea ma onomea.

Ae o le a su'i tonu le mata o le niu e tusa ai ma lo'u tulai atu Fai mai le mataupu e pei ona filifilia:

“E onomea ‘ea ma Talafeagai ona Avea Tama'ita'i poo Faletua e fai ma Faifeau?”

O le onomea (aesthetics) o le tasi lea o poutu o le Ta'otolima o le Tofamanino a Samoa (Aiono F, 1997) O lona uiga o le talafeagai ma ua tataua. E mafai ona faapea pe a talanoa i le gagana o aso uma. E ese le onomea o si tama'ita'i i lana saasaa. Pe faapea foi pe a fai ni saoga mo se faalavelave: “E onomea ona ave lena tama'i ie e fai ai mavaega?” Pe faapefea foi: “E onomea ona tuiga se faletua o se alii o se nuu i ni fialia ma

“Droozhba, emir!”

i o matou alafau, ma fetagisi e pei ua faato'a toe feiloai i ni o latou aiga ua leva tausaga e le'i feiloai.?

Na oo mai ai i o matou loto le manatu, e na o le tasi lava le mea e mafai ai ona maua le filemu, *peace*, i le lalolagi nei, poo se aiga, poo se nuu, poo se atunuu, o le avea lea o isi tagata ma ou aiga, ma uo. E tatou te fusifusi fialia, ma feasogi, ma fetagisi, ma sisiva, fefaamagaloa'i, ae le o le fe'aina'i, fetaua'i, femisaa'i, fefaaleagaa'i, fetauia'i. ###

taualuga faafiafiaga a se nuu?” O lona uiga o le fesili, pe lelei, pe fetau ma talafeagai ma finagalo aemaise le maimoa mai a isi tagata. Tainane le silafaga a le Atua.

Tama'ita'i: O le tamaitai o le tama e ta'i iai faaaloaloga a aiga. O ia o le feagaiga. O totonu o le lotofale i totonu ma fafo atu o le aiga e iai le feagaiga tausi a le aiga. E faapelepele ma tausi ia te ia, o le mafuaaga foi lena na to ai e le Malietoa le feagaiga i uluai misionare na aumaia le Tala Lelei ona e taua ia te ia lana feagaiga poo lona tuafafine aua o lona 'i'oimata. O le Tama Fafine a le Aganuu e puipui ma tausi e tamaalii ma failauga o afio'aga ma alaafaga. (Leaupepe Pita). O le ua faalanuma'ave'ave na te pae ma auli ni vevesi aemaise aiga. Ona ia ave lea iai o le upu faafeagaiga aua o le a o faafeagai ma nuu. O le faalupega aupito sili lea ma taua mo faifeau aua o le faafeagaiga e taulagi pea e afioaga ma nuu. O lona uiga e le tau su'ea se tulaga o oe le tamaitai aua e te maualuga lava oe i lou aiga ma lou nuu. O Samoa i aso anamua na o le tolu lava saofaiga sa iai. Na o le Saofaiga a Tamaitai, Aumaga ma Matai. Peitai ina ua taunuu mai papalagi ma fai foi Komiti Tumama, lea na ala ai ona faaopoopo le Saofaiga a Faletua ma Tausi.

O **faletua** o le upu lea ua ave i ava a tamalii faapea foi ma faifeau. O nisi ua le fialia ina ua ta'u i latou o faletua. Peitai o le uiga faatofamanino o le upu faletua, o le fale e tua atu iai le tofa ma le faautaga a lana tane. 'Aua lava nei manatu mama se faletua i lona faalagiga lea. O oe e te tu mai i

tua o lau tane. A lelei le fale i tua, ua lelei foi le saofaiga i luma, ae a faaletonu ua faapena foi ona faaletonu luma. Manatua lelei e leai lava ni gaoioiga poo ni tapenaga e tapena mai luma. E ala uma mai tua mea uma. E pei lava o le upu: O le ala i le pule o le tautua. O lona uiga o oe le faletua o le fesoasoani.

Ina ua uma ona faia Atamu le uluai tagata, ona faapea lea o le Atua e le tataua ona nofo toatasi o ia ae ao lava ina iai sona fesoasoani. (Kenese 2:18). O lea na ia faia ai loa le fafine. Fai mai na ia faamoegase ia Atamu, ona toina lea e ia le tasi o ona ivi'aso'aso, ma faasoo ane le aano e sui a'i. O le ivi 'aso'aso foi na toina e le Alii le Atua mai ia Aamu ua na faia a'i le fafine. Ona faapea ai lea o Atamu, o le ivi lava o o'u ivi ma le aano o o'u aano, e ta'ua foi o ia o le fafine aua na toina atu o ia ai le tane (Kenese 2:21-23). O lona uiga o le fafine na ala ona fai e le Atua ina ia fesoasoani i lana tane. Na tuu foi e le Atua le pule ia Atamu na te pulea ma faaigoa ai manu vaefa uma lava ma manu felele e oo lava i lona fesoasoani o Eva. O lona uiga ua uma ona tuulaupua e le Atua nafa a le tane ma le ava e fai. O ia o le pule aoao (superior authority) i le tagata na ia faia e pei o Atamu, ae o fesoasoani nei ia Atamu e pei ona taua na tuu iai le pule i lalo ifo (inferior authority). O lona uiga e malosi le pule a le tane i lo le fafine. O le ivi o le faailoga o le malosi, a o le aano o le faailoga o le vaivai. Letioa foi a ave le faalupega lena i le saofaiga a aumaga ma taulele'a, “O le malosi o le nuu” aua o latou e su ai ivi o le nuu. O latou foi e ta ta ai fatu o le nuu.”

O le upu fesoasoani o lona uiga e lua ni vaega e faatinoina. E pei lava o se tasi o vaogagana o poula: “Fai sa tatou soa”. E pei foi o Tuiaana Tamaalelagi na fai ona

faaauau itulau e 13

O le Fanau - o le Tofi lea mai le Atua

Tofi: O le papa faapitoa a le tagata. O le Sootaga sili ona mafiafia ma vavalalata. Ua fai ma itutino moni o le tagata. O se gafa i le toto, ivi ma aano, tino, mafaufau ma le agaga.

O lona uiga o le tofi o le tagata - o ou totino moni lava.

E faamoemoe ma faalagolago ia te oe i mea uma lava e malosi ma tupu ai ma manuia ai lona olaga. Manuia le ata faatusa o Ieremia 12: 8,9: “O lo’u tofi ua pei o se manufaei pei o se leona o le vao ua aū leo tele mai ia te a’u....! O le atu o le tofi - ua le faamalieleina ona o tiute e talafeagai ua le faia iai.

O fanau o le tofi faapitoa o matua e tausima ma fafaga ia tutupu a’e ma malolosi ma ola manuia ai i lenei olaga. O a lava mana’oga o le fanau i mea e aoga, taua ma tata; faaletino, faale-mafaufau ma faale-agaga. O tiute tau’ave lava ia o matua. E saili ai lava i maila e lua pe tolu, e ausulusulu ai ma le naunau, ina ia faamalieleina mana’oga o a latou fanau.

Manino lelei Iesu i lea tulaga o le alofa moni faa-matua. O le masani e le mafai ona tuua. O lea foi na ia fesili ai - “O ai foi so outou....” Silafia lelei e Iesu le tali o lana fesili. Aua e leai se matua valea e ave se maa, e tali ai le mole manava o lana tama. Ae matua taumafai lava ma saili ia maua se areto, se mea’ai, ina ia ola ma tupu malosi ai le tamaitiiti, pei lava o fanau a meaola uma o le

foafoaga. Aua o le taimi sili foi lea ona taua e faatino ai tiute uma i le tausiga ma fafagaina ma le faavaeina o olaga o fanau a o iti lava.

O lea tonu le faamamafa a Iesu ma lana fesili.

(1) O le taua o le faatinoga o tiute alofa faa-matua. Aua o lea tonu le ata o le tausiga alofa a le Atua i ona tagata.

(2) O le taua tele o areto (mea’ai) - mea e tata ai mo le malosi tuputupu a’e ma ola manuia o fanau. O lea foi le pogai na lagolago ai e Satani le taua o mea’ai. Na fai ai ia Iesu e faaliu areto maa, ina ua fia taumafa! Peitai o le tali a Iesu ia Satani, na feluia’i ma iloa tino ai le faamamafa. “E le na o mea’ai e ola ai le tagata! Aua e ui ina taua areto ma mea’ai, ae sili foi ona taua isi tiute faa-matua, e tata ona fai. Aua o areto ma mea’ai, ua na o sina taimi puupuu e ma’ona ma malie ai. Aua o mea e mavae ma pala e le tumau a o mea’ai faale-agaga, o mea e tumau seia uma le ola o le tagata.

O le uiga tonu lea o maa oloo ta’ua, i le tala ia Iosua (Iosua 4), O le ata o mea e tumau e mausali, malosi, anagata, e au tupulaga e au tausaga e molimau maumaututu, ma atoatoa.

O lea na fesili ai fanau Israelu i o latou matua: “Pe se a le uiga o na maa? O latou agaga oloo galala i le fia aai mea’ai (areto) faale-agaga.

Oloo fia iloa ma malamalama i uiga o mea eseese o le olaga. O le natura masani lea o tamaiti a o laiti, e fiafia e tuu fesili (curiosity).

O fea o latou tupu’aga? O ai o latou gafa? Aisea a tatou tu ma aga? E aoga le alu i le a’oga? Aisea e faitau ai le Tusi Paia ma tatalo? O fea o iai le Atua? Aisea e alu ai i le lotu? Aisea e foa’i ai ma fai taulaga? Aisea e foa’i ai mo isi tagata? Se a le uiga o na maa?

Le aia tataua lea a le fanau e ao i matua ona faatino ma faamaliele ma tali atu iai. E le gata i lea, o le faaiuga lava o le fesili a tamaiti Israelu: “Se a le uiga o na maa ia te outou?” O lona uiga oloo fia vaai i se molimau tupito faapitoa a lona tama ma lona tina. Pe faape’i lou loto ma lou agaga. Pe iai se malamalama agai mai i le Atua, agai i lou ola alofa, faamaoni, faatuatua, lou onosai, loto mauualalo, faamagalalo, amiotonu, foai i le lotu.

O lona uiga oloo latou fia vaai ma iloa le Atua oloo e tapua’i ma auauna iai. E ala i maa oloo vaaia i lou olaga, i le anagata o lau amiotonu, i le mausali o lou faatuatua, i le tumau o lou onosai tina, o lau auaunaga faamaoni ma le le maluelueina o lou alofa faatama ma faatina.

Fai mai foi Iosua, ‘O maa, o faailoga vaaia o le Atua ma lona mana, na ta’ita’i ma sopo’ia ai e Israelu le vaitafe o le Ioritana. O pine mautu o le tausiga alofa a le Atua i ona tagata amio Atua. O le fesili, o iai la ni maa e iloa ai le mana lavea’i o le Atua i lou tagata, lou toalua. lau fanau i aso ia o lou ma’i, lou mativa, lou ma’i tigaina. Aua faaola ma lavea’i oe ma lou aiga?

faaaauu itulau e sosoo ai

O le Fanau - o le Tofi lea mai le Atua

Matua e, o le uiga tonu lava lena. Aisea? Aua ua molimauina ma faamaonia o le taimi aupito sili lea ona taua i tiute faamatua, o le tausiga i le fafagaina ma faavaeina o fanau i totonu o o latou lava aiga.

Fai mai le Tusi Paia: “Fafaga ma aoao le tama ia tusa ma ona ala, a oo ina matua e le toe te’a ese ai lava.” O lona uiga, “A fesili mai lou atalii i se areto, ave iai se areto. A fesili mai i ni maa, ave iai ni maa!” e faavae ai o latou olaga. Aisea? Aua e

le fesiligia i lo outou silafia le anoanoa’i o faafitauli ma faigata eseese ua aafia ai a tatou fanau. Ua avea le taugata ma saosaoa o le soifuaga ua mumu faaafi ai le agasala ma le amio leaga, ua fiafia iai ma ola ai ma fano ai le toatele o fanau ma tupulaga.

O le mea lea, o le fautuaga, “A fesili mai le fanau i se areto, ave iai ni areto. A fesili mai foi i se maa, ave iai ni maa!” E le ni maa e tau’ai ma fetogi ai ma faamanu’aina ai e ono oti ai. A o maa e faavae ai ma fausia ai o

latou fale i luga o le papa, o Iesu Keriso ma lana faaolataga.

Le fanau e, ‘oe le teine ma le tama ia fai ma sini i lou loto ma lou agaga, “Ia fai ni maa faamanatu o lou olaga!” ‘Oe le teine ma le tama.

Ia manuia tele lo outou Aso Sa o Tamaiti. Ona o Iesu. Amene.

(Ua le mautinoa le faifeau na ia auina mai le lauga lenei. A maua, ua faasilasila atu i le Sulu Samoa.)

<p>(Father, report card in hand): “Son, it’s too bad they don’t give a grade for courage. You would get an “A” for bringing this report card home?”</p>
--

E onomea ona avea Tama’ita’i ma Faifeau?

mai le itulau e 11

posoa e iai nei le upu: Tatou fai posoa ma sisiva fiafia e pei o le upu ia Tui Aana Tamaalelagi (Tuigamala F.1993). Tainane le vaogagana o le lagi malofie. O ai e soaina lau tatau? O nisi alii e soa lava i o latou taitoalua. E faasoa iai le tiga. E iai foi upu o faatufugaga. A gau le poutu e tali pou lalo. O lona uiga o tatou tina e fesoasoani i le poutu. O ai le poutu? O lau tane. E mafai ona tatou poutu i o tatou lava nafa faatina, aua e foliga mai i le tele o Ekalesia, o tina lava le poutu o le galuega, ona o a latou taumafaiga aua le manuia o le Ekalesia i le itu i fafo o le galuega. Peitai e le avea lena ma mea e sopoutu ai a tatou nafa ma o tatou taitoalua. E le avea foi le poto ma le atamai o le tina na te faoa ai le tofi o lana tane o le matai, o le aoao, o le tiakono poo le faifeau foi. E le o toe po se lilo i lenei vai taimi i le tulaga ua iai

nisi o tatou Ekalesia ua faifeau uma le faifeau ma lona faletua.

Se’i o tatou toe tepa tasi i tua i le

faavae na tuuina e o tatou tuua ua mavae, o e na latou asaina le gasu o le taeao ma latou taliaina le Tala Lelei. O le aumaiga foi o le Tala Lelei e le’i aumaia e ni fafine. E sese ea le faavae na latou faia? Afai e sese, aisea la na le faifeau uma ai ma le faletua i na ona po? O le a sau taga’i ae fai le tina ma
faaaauu itulau e 20

MATINI LUTERU

mai le itulau e 7

taumafai e tape ta’itasi putaputa o le tanesusu. O faifeau nofo’ese sa latou faia mea uma ia sa fai foi e monike, vagana ai, latou te le’i faia ina ia faamagaloina ai a latou agasala, ae ina ia maua ai se feiloaiga ma lo latou Atua. Sa anapogi, tapua’i, tatalo, ta’uta’u agasala, fai ma galuega e faamalieina ai le Atua. Peitai, o nei mea uma na latou fai, sa faavae i luga o lo latou talitonuga, o le a latou maua ai le auai mai o le Atua i lo latou ola. O le mea moni, sa latou saili moni lava i le Atua.

“Alofa i le Atua? Ou te ita iai!”

Sa tau faato’ato’a e Sitopisi le mafaufau vevesi o Matini, ma

fautua iai, e tasi lava le mea na te fai, o le alofa lea i le Atua. Ae na tauemu Matini i lea manatu. E fepi’opi’oa’i solo lana vaai i le Atua ma Iesu. O le talitonuga o Matini, o le Atua ma Iesu, e ma’ema’ea ma sasa’o o la uiga, ma ona o o la uiga amiotonu ia, o le mea lea o le a la faamasinoina ai foi tagata.

I ni tausaga mulimuli ane, ona ia ta’ua ai lea o ona lagona i le vai taimi lea o le faaletonu o lona mafaufau e faapea:

Mata e le’i tuulafoa’iina e le Atua tagata, faama’a’ a o latou loto, faamalaia latou, e pei e fiafia o ia i le agasala ma le puapuagatia o tagata? O ia lea oloo ta’ua e faapea
faaaauu itulau e 14

Lotu Faamanatu Maa o le Tusi Paia

mai le itulau e 6

faatino i aso ua mavae, a ua le mailoa pe aisea. Ae faafetai i le Agaga o le Atua, oloo ia galue mai ma musuia pea lenei aulotu e tatau ona faatino lea fuafuaga sili ona taua.

Ua tasi ai le fuafuaga a le aulotu, e talu ai o le aso 27 ma le 28 ia Iuni 1945 na faatuina ai le uluai Maa o le Tusi Paia, ma

o le 27 foi ma le 28 o Iuni 2012 na tatala aloaia ai le Maa Fou o le Tusi Paia, ma toe faaulufaleina ai le malumalu toe faafou ua iai nei, o lea foi la ua finagalo ai le faifeau ma le aulotu, o le Aso Sa, e aupito latalata i le aso 28 o Iuni i tausaga uma, o le a faia ai le Sauniga Faapitoa o le Lotu Faamanatu o le Maa o le Tusi Paia i le “Papa o Misi” EFKS Avao.

Ua finagalo foi lenei aulotu, o le a le faamamafa nisi tulaga e pei ona masani ai i aso faapitoa faapea, ona e ono see ese ai mai le itu taua oloo fia faatauaina ma faamamafaina - Ole Lotu Faafetai i le Atua, ina ua tusi aao i le EFKS e ala i lenei laueleele ma lenei nuu o Avao i Matautu, e faatino ai lana galuega pa’ia, o le liliuina o lana Afioga Pa’ia, i le Gagana Samoa. Ia tolaulau pea le tala faasolopito o le liliuina o le Tusi Paia i Avao, ma faailoa tama fanau ma lupe faalele uma a lo tatou nuu ua o i le Tala Lelei ma le Malo, ma galuega eseese, e lu’itauina ai pea alo ma fanau, ina ia ofoina atu pea lo latou olamo le Tala Lelei a le Atua. Ua faavaeina foi le Taulaga ua faaigoaina “Taulaga o le Lotu Faamanatu i Avao”. O le Taulaga lea e tofua saou uma iai le aulotu, o ana tama fanau ma lupe faalele, o paolo ma gafa maualuluga, o uo ma e masani, i le aso tonu o lea Lotu Faamanatu, aua le atiinae ma le saga faaleleia o le Maa o le Tusi Paia, faapea le feau ma le galuega a le Atua i Avao.

E fia faaogaina ai foi lenei avanoa i luga o le Sulu Samoa, e faamanatu atu ai, ma faailoa atu ai i soo se Avao, i paolo ma gafa maualuluga o lenei nuu ma lenei aulotu, aemaise o tama fanau ma lupe faalele oloo galulue i le Ekalesia, le malo, o faalapotopotoga, ma soo se tafa o Samoa ma le lalolagi, faapea foi uo ma e masani, o le Aso Sa 29 Iuni 2014, o le tatou Lotu Faamanatu lena. A o le Agaga autu foi lena o lenei Lotu Faamanatu e pei ona faailoa i luga, e leai se agaga e faatele

MATINI LUTERU

mai le itulau e 13

o le alofa tunoa ma le lelei atoatoa?

E oo lava foi ia te au na ou oo i le tulaga o le matua leai o se faamoemoe ma ou manatu ai, ma’imau pe a na ou le fanau mai. Alofa i le Atua? Ou te ita iai!

Ona manino ai lea ia Matini lana agasala aupito matuia: O lona ita lea i le Atua. Na ita o ia ona e faamasinoina e le Atua tagata. Na ita o ia ona e le taitai ona ia ausia le lelei atoatoa o le Atua. Na ita o ia i le Atua ona o lona tuuina atu o tagata i temoni latou te tatosoina i le malaia, ae o lea sa taumafai atu lava tagata e faamalieleina lona fingalo. I le manatu lava ia o Matini, e matua faigata lava ona alofa se isi i le Atua.

O le Ala i le Faaaliga

E foliga mai ua matua faaletonu lava le mea ua iai nei Matini. O le a se mea a fai i lenei patele fevesia’i lona mafauafau? Ona fai ai lea o le togafiti a Sitopisi. Ua ia tuua lona tulaga i le Iunivesite o Uitenipeka ma ofoina atu mo Matini Luteru. Ae na ofo ai Matini ona o lea e faaletonu lona mafauafau i le mau fesili ae o lenei ua tuuina mai lenei galuega na te faia. I le talionuga o Matini, e matua le fetau o ia, e le o sauni foi o ia mo lea tofiga, ma e matua le agavaa lava o ia mo lea tofi. Ui

lava i lea, ua tofia o ia o le Foma’i o le Mataupu Silisili (Doctor of Theology) i le tausaga e 1512, a o faato’a 29 ona tausaga.

‘A ‘e faia’oga i le Tusi Paia, e tatau ona e mua’i su’esu’e i le Tusi Paia. O le manatu o Sitopisi, o le a maua e Matini tali o le tele o fesili oloo fevesia’i ai lona mafauafau, pe a su’esu’e o ia i le Tusi Paia. E fou le Tusi Paia ia Matini. E le faapea ona o le leai o ni Tusi Paia, ae ona e le faamamafaina le faitau i le Tusi Paia. O le mea moni, sa fai ma ana mea faitau isi tusitusiga pa’ia ae le o le Tusi Paia.

O le sese aupito matuia a le Lotu Pope le faaavanoaina lea o Matini e faitau le Tusi Paia. **Tau ina ia iloa le mea lenei, o i latou latou te faitauina le Tusi Paia o le a fai ma fili o le tapua’iga mate.** Aisea? Aua e faaoga e le lotu le valea o tagata. E faavae a latou mau i o latou lava mafauafau, talatuu, ma isi mea e faama’ite a’e e le lotu, ae le o mea oloo iai i tusitusiga pa’ia.

mai le tusi: God’s Generals
tusia e Roberts Liardon
faamatalaina e
Afemata T. Apelu Aiavao

faaauau itulau e sosoo ai

Lauga Aso Sa o Tupulaga 2014

lakopo. O le Atua e paia e mamalu ma silisili ese. E afio i le lagi ma le lagi o lagi. Lea ua mau faatasi ma tagata.

A o le Atua foi lea ma le Tupu, na te faia le faaolataga, e aumai le manuia ma le filemu i Siona. Le Mesia o loo nofo tatali i ai lutaia, ua afio mai o ia i lona lava nuu, ae ua lilo i la latou vaai. O le aso nei, ua tini pa’o le uto. O le tala fasolo o lutaia i le nuu ma le malo, o ona augâ tama ma augâ tupu, o le tulafono ma perofeta, o lona malumalu ma lana tapuaiga, o ana feagaiga ma lona Mesia. Ua faataunuu uma ia Iesu. Ua afio ae o ia i le mauga, ia matilatila lona tulaga ese, e

faasaga a’e i ai mata o lutaia, ma latou silafia.

E faapea foi le uiga o le uluai upu o le lauga, le Amuia. O fia faamatala ai lona sini ma lona autu. Le faamoemoe aoao o le afio mai o Iesu. Ia tino mai manuia, manuia ua leva ona folafola, amata mai ia Aperamo, “o lau fanau foi, e manuia ai atunuu uma lava o le lalolagi.”

Ua lau i ‘ula le asô, ua tepa i ‘ula, tago i ‘ula. Ua latou militino faatasi ma le Manuia. Amuia le lutaia, e vaai, e faalogo ma na iloa.

Ua afio a’e i le mauga, mo lana lauga faataupou, ua folasia ai le anavatau o lona malo fou,

le Isaraelu fou. O tagata uma e talia, ma faatuatua ia te ia.

“Ua nofo ai i lalo, ona o mai ai lea o ona soo ia te ia.” Mo nisi, o le nofo i lalo, o le fa’aaliga o le âva ma le faaaloalo; o nisi o le faailoga o le loto nutimomoia ma le salamô, e nofo i le efuefu. O nisi foi, o le malolo ua mapu mai feau. Ae o le **nofo i lalo** pe a faamatala ia Iesu, o le faaaliga o lana pule aoao, o lana pule faatupu, lana pule faa-Kerisiano manumalo. Fai mai le tusitala i le ‘au Eperu, “Ua tutu foi ositaulaga uma, ua auauana i lea aso ma lea aso. Peita’i ane o ia na avatua e ia le taulaga e tasi mo agasala, ona nofo lea o ia i le

faaauau itulau e sosooai

Lotu Faamanatu Maa o le Tusi Paia

ma faamamafa nisi tulaga, nei see ese ai ma le itu taua oloo fia faatauaina, a ia faamamafaina le loto faafetai i le Atua, ma faafofoga i le Talafaasolopito o le liliuina o le Tusi Paia i Avao, e aoga tele mo tupulaga o nei, taeao ma le lumana’i, aemaise o sou sao i le tatou Taulaga o le Lotu Faamanatu aua le atinae pea ma le saga faaleleia o le feau ma le galuega a le Atua i lou nuu ma lau Ekalesia pele i le Papa o Misionare i Avao.

Pese o le Viiviiga o le Papa o Misi i

Avao

Fai mai o lalo lava o le talie
I tua ane o le Fale Vali e
Na punonou ai o alii o le Komiti
Ua ta’ua o le PAPA O MISI.

Tali:

Pepese ia, i le pese
Faafetai, i le lagi
Ua aofia mai le Ekalesia
I le Maa o le Tusi Paia..

O le meaalofa sili a le Atua
O le atamai na tuu ia Misi
Na to’ia ai i le Mana silisili
Ma tama o le motu o Savaii.

Misi Parate Leuatea o Safune
Leota Penitala o Matautu
Maiava e o Sato’alepai,
Talavou o Sapapalii.

O Laupu’e mai Samauga
O Petaia o Lalomalava

O tama ia sa iai i le Komiti
Ua ta’ua o le PAPA O MISI.

Matia Matia Ituau
Finao ma Vaituutuu
Na sunu’i ai le Malo o le Atua
Na valo’ia e Nafanua.

Le gasolosolo mai o isi lotu
Faaali o le mau taofi
A ua mautu le faavae o le upu moni
Ua to’ilalo ai seoli.

O Avao lo’u nei nuu moni
Ou te pese ai ma olioli
Na liliu ai o le Tusi Paia
Ua faitau ai lotu e fia.

(Saunia mai e
Tavita Kirisimasi Salaa Fiti FS
EFKS Avao.)

Lauga Aso Sa o Tupulaga 2014

itu taumatau o le Atua e faavavau."

O le faafotutupu ua fai i luga o le mauga. O le nofo ma le saofa'i, a le pule mamana. O upu o le lauga, o upu e i ai le pule ma le mana. O upu e maua ai le ola, le malosi ma le potu. Soo se taimi, soo se nofoaga e laugaina ai, e le foi fua mai, se ia faataunu'u le mea o finagalo ai o ia..... o upu e faamasinoina ai i le faia pe te'ena.

Na te tofofi ma valaaulia nisi e fai mana failauga, e faae'e atu ma faasafua i ai lea mana ma lea pule, latou te molimau, ma a'oa'o atu, ina ia pulea ai loto ma agaga, faatonu ai le amio, tapasa le olaga atoa o le tagata, ia maua le manuia. Ia maua le faatusa ma foliga paia o le Atua, na uluai faia ai.

Ua amata lana tofiga i lona au so'o. O nisi foi o le motu o tagata, o lupe na fa'ia mai le fuifui, e tusa ma o latou ituaiga e sefulu ma le lua. "*Ua ia fetalai atu ma a'oa'o ia te i latou: Amuia.*"

E avatu ai malu i pu'ega i le motu o tagata, ona o le malo ua faatuina e lesu, e le mai lalo nei. E le faale-lalolagi pe faale-tino. E ta'u o le malo o le lagi, ona o le lagi e fa'aatoatoa ai ona tatou sapaia fa'amanuiaga. Ae o le malo e faatino lava iinei, i o tatou loto ma agaga, ina ua tatala atu, e talia lesu na o ia e toatasi, e ala i lona Agaga Paia, e pule ai. E faia i totonu o le fatu, e le o le toto ma le aano ae o le lagona

o le alofa o loo nofo ma puna ai i totonu o le fatu.

Ua faasolo lelei le faamanuia i ona laasaga ta'itasi. O le faasitepu faaleagaga lea, e ui faasolosolo ai le tagata, ua auai i le malo o le lagi.

E amata i lona mativa faaleagaga. Le lagona ifo o le ausage ma le gaogao'i'i, e leai se malosi e mafaia se mea. E tupu ai le ola faalagolago tasi, i le alofa tunoa o le Atua, seanoa o ia. Ulufale mai i le malo o le lagi.

E te tu loa i totonu, e sosoo ma le lagona le faanoanoa loloto, le uiga o le salamō faamaoni, ina ua iloa ma tautino agasala, ua inoino i ai. E faamafanafanaina i le mautinoa o le faamagaloga, mai le alofa mutimutivale. O a foi fa'anoanoaga i puapuaga e oo mai, ona o le suiga fou ua savalia nei, ma le malo fou ua tagatanu'u ai, amuia oe, ua e mafanafana i le afisi ma faafuata i le fatafata o lou Alii.

E laa atu i le agamalu, o lagona e aofia ia le loto maulalo, e onosai ma faapalepale, e faamagaloga, ma tali filemu. E talia tiga, ma lafoai i le Atua amiotonu na te faia le tau, ma aumai le to'amalie i lona agaga.

Ua oo ina galala i le fia 'ai ma fia inu i le amiotonu, ua na o mea lelei, mea tonu ma mea sa'o e naunau i ai. Ua iloa le ese'esega, o le moni o le 'oa faale-lagi, mai le pepelo o le

matagofie fale-tino. Ua 'alo ese mai le pi'opi'o, ua loto tele e finau mo mea tonu ma mea sa'o. E inosia ma faasatauro ai, ae le popole, o le ute lena o faigamea, i le malo o le lagi. Ma faasolo ai le 'apefa'i se'ia tualuga, ia outou olioli ma fiafia lava, ua taunuu i le lagi, o i ai le tau e tele.

Outou tupulaga talavou e faasino tonu i ai lenei Aso, ia o lea ua outou folafola i luma o le Atua, la outou Tautinoga e Ola ia Keriso. Ua outou i ai nei i le osoosoga o le malosi ma le potu. Ua aga atu e faafetaia'i lu'itau o le soifuaga, ma galuea'iina meaalofa a le Atua ua outou agavaa ma talenia ai.

Afai e te fia oo i le tumutumu, o le apefa'i lea e faaeaina ai oe ina ia taunuu au miti, ma tau lau o lou faamoemoe. E le gata ina maua manuia o le ola nei, ae silisili ai manuia i le malo o le lagi. O faamanuiaga e le 'atia, e le pala, e faavavau.

Mo i tatou foi le motu o ta'ita'i, ua valaauina i tatou mo le galuega faasino i tupulaga, e tua i ai a taeao. Ua toe fafagu mai le autu o lenei Aso. O tupulaga e leai se malosi. Ua lafo mai le galuega i outou aao ma o matou lima, i le sailiga o latou manuia. Ua faamanatu mai matua, lau silasila ma lau fetalai. E ofaofata'i, e faatonu ma a'oa'i. Ina ia 'aia le mapu le lauga e fafaga i upu, upu e moni ma upu alofa. Ina ia ta'ita'i i latou e o a'e i nofoaga e maua ai manuia. O falea'oga, fale o

--

faaauau itulau e sosoo ai

Pe a oo ina savaliali mai le alofa

Na o le faalua ona ou feiloai i lo'u tina i tausaga ia e 15 ua mavae. Na fai lava la'u upu ou te le toe fia vaai iai se'i oo ina te'a lo'u ita ma lo'u le malie iai.

Ae na oo lava ina ou oo iai ma ma feiloai. O le ma po muamua, e leva le po o ma talanoa lava. Na ou fai iai i le tele o taimi na te faifaiina ai a'u, ma ta'u a'u o le "Tama'i Tapu". O lana igoa lea e faaigoa ai a'u i le igoa o lo'u tama, o Tapu. Na sola lava lo'u tama ae tia'i ma'ua ma lo'u tina a o o'u pepe. Ina ua ou matua, ou te manatua e tele lava ina otegia a'u ma fai

mai, "E te soo uma lava i lou tama i lau amio. O oe o le Tama'i "Tapu!"

Na amata ona tagi lo'u tina ma fai mai, "Malie lou loto, ou te iloa lava sa le tatau ona ou lafo atu ia upu ia oe." Na ou iloa i lea taimi e tatau lava ona ou faamagaloina o ia ona ua salamo i ana mea sa fai ia au i ia tausaga e tele ua te'a. Na ou talitonu foi e tatau ona faate'a ese ni lagona tiga o totoe ia te au, ona ou fai ai lea i lo'u tina,"Ta savaliali ma ta talatalanoa."

Na amata ona ma savaliali ae

ou mafaufau ifo, 'Le Alii e, o fea a amata ai a'u tala.' Ae pei e musumusumu mai le Alii, "Savaliali pea, aua e te tautala." Na ou manatua lo'u fefevale i mea nei o gata. Soo se gata lava ou te vaai iai ou te tete ma 'e'e i luga i lo'u fefe. E iai se po na ou 'e'e ai faapea a'u o moe se gata i lalo o lo'u faamalu. Na alu atu lo'u tina ma faaafu lelei a'u ma faamoemoe.

E le'i umi ona ma savaliali i le oneone pa'epa'e, ae tutupu a'e ia te a'u lagona, pei lava ua ou toe teineitiiti, ma ou toe manatua ai upu mamafa sa

faaauau itulau e 19

Lauga Aso Sa o Tupulaga 2014

matai, malumalu tapua'i. Ne'i naunau e vave ona selesese, ae le'i lava ona lûlû.

Mo faiga nuu ma faiga malo, i tofi ma tiute faata'ita'i. Ina ia lima ta'ita'iina ma faatonutonu, e le alafua tau le malo o le lagi. A pulea e Keriso lau faatofalaiga ma le faautaga, e le toe vaia le matapeapea, le tuinanau, ma le amioletonu. E le toe lagona le faasausili, ae o le agamalu ma le alofa. Ua tele atina'e, faitau miliona le tau. Manatu a faasafua nisi miliona mo le atina'eina o fanau, ona paleni lea. Ne'i faapito manû na o tupulaga o lou nuu, itumalo ma lau lava Ekalesia. O atina'e o mea e tatau, e tâua ma aogâ, ina ia tatou o faatasi ma le lalolagi. Ae aumâ ni manuia e mavae ma pala, pe afai e fano ai agaga, ona o le agasala o loo fai ma mânu a'e ai.

O le faamalosia'au foi i le au failauga folafola o le Tala lelei. Le aufaigaluega paia i Faifeau ma A'oa'o. E aofia ai ta'ita'i Aulavou ma Faia'oga Aso Sa. O la tatou fatuaiga tausii, o la tatou matafaioi autu, o le a'oa'o ma fafaga i le itu faaleagaga. E faaopoopo auala a le fili i lea augâ tupulaga ma lea tupulaga. E faatupulaia faafitauli o le fanau. E ao ai ona faafou ma teuteu a tatou au'upega ma metotia, e fai ai le galuega, ma e faafetaia'i ai le fili. Ona o le autu o lenei Aso ua faasino i le upu, i le lauga i luga o le mauga, o se faamanatu lelei foi, i tiute faafailauga, auâ le fafagaina o agaga. Ina ia lava o tatou taimi e faaalu, ma lelei saunia lauga, o a'oga ma mataupu faaleagaga, ia saofagâ i latou uma i le malo o le lagi.

Le atunuu e Samoa, ma le Ekalesia pele a Iesu Keriso, ua

faaalua nei le alofa tunoa o le Atua. O manuia na amata folasia i lenei mauga, mulimuli ane na faataunuu i luga o le satauro. Na puapuaga ma maliu tiga, ae na toe tu manumalo mai le oti ma le tuugamau. Ina ia tatou manuia. Ia magalo a tatou agasala, ma tatou maua le ola e faavavau.

Ua valaauina i tatou uma, e auai i faamanuiaga o Iena Faaolataga. E le'i tuai. O loo matala pea le faitotoa o le malo, mo e salamo faamaoni ma faatuatua faamaoni ia te ia. Amene.

Saunia: Faitoaga Tolu (FS)

Faatonu Matagaluega A'oa'oga Kerisiano.

(ma le Matagaluega Falealili Sisifo)

(E sui ai le lauga na fiifilia e le'i taunuu mai. A taunuu mai ua lolomi atu i le Sulu Samoa.)

I Tafatafa o le Tuugamau Tuufua na tali atu ai Maria: “Raponi e!”

Ioane 20: 11-16: A o Maria, ua tu o ia i fafo e lata ane i le tuugamau, ua tagi ai. Ua tagi o ia ma punou i le tuugamau., ona iloa atu lea e ia o agelu e to’alua ua oofu i ofu sisina, ua nonofo i le mea na tuu ai le tino o Iesu; o le tasi e i ulu, o le tasi e i vae. Ua ia fai mai ia te ia, “Funā e, se a le mea e te tagi ai?” Ua faapea atu ia ia te i la’ua, “Aua ua latou aveese lo’u Alii, ou te le’i iloa foi le mea ua latou tuuina ai o ia.” Ua ia fai atu na upu, ona faliu lea i tua, ona iloa atu lea e ia o Iesu ua tu mai; ae le’i iloa e ia o Iesu lava lea. Ua fetalai atu Iesu ia te ia, “Funā e, se a le mea e te tagi ai? O ai ea e te sailia?” A o le fafine, fa te ia o le leoleo o ia o le fanua, ua fai mai ia te ia, “Le alii e, afai ua e aveese ia te ia, ta’u mai ia te au poo fea le mea ua e tuuina ai o ia; ona ou aveeseina lea o ia. Ua fetalai atu Iesu ia te ia, “Maria e.” Ona faliu lea o ia, ua fai mai ia te ia, “Raponi e!” (o lona uiga, le a’oa’o e). - Ioane 20: 11-16.

O le manino ma le o’oo’o ifo i lagona o tagata, upu o faamatala ai e Ioane lenei tala i le feiloaiga a Iesu ma Maria le Makatara, na faapea ona momomo ai le loto ma lagona o se tusitala ma o se fatupese foi, o Austin Miles (author/composer), ma ia tusia ai le pese: “In the Garden”. Ae na faaosofia lenei tusitala fatupese ina ua talosagaina o ia e se

faipisinisi lolomi musika o Dr. Adam Geibel, se’i ona fatuina se pese e mafai ona momoli atu ai lagona alofa ia i latou ua leai so latou faamoemoe, ona o puapuaga ma mafatiaga o le olaga. Ona sauni ai lea o Austin Miles e fatuina le pese.

Fai mai a ia, o se aso i le masina o Aperila i le tausaga e 1912, sa nofonofo ai o ia i se potu pogisa. Na tago atu o ia i lana Tusi Paia, ua opo mai i lona fatafata, ma tatala, ma matala, i le tusi ma le mataupu e sili ona fialia iai, Ioane e 20. Fai mai a ia e le fiu e faitau i le tala ia Iesu ma Maria le Makatala. O le feiloaiga a Iesu ma Maria le Makatala, e le uma ona ia maofa ai. A o faitau ai o ia i lea aso, na pei ai ua iai moni lava i le fanua oloo iai le tuugamau na teu ai Iesu. Pei ua vaai atu ia Maria le Makatala, ua tootuli ifo i luma o le Alii, ma alaga: “Raponi e!” Sa afisi lava le Tusi Paia i ona lima a o vaavaai atu o ia i le pui-pui lanumoana o le potu. A o peiseai e moumou malie atu le malamalama, ua pei o se miti, lea ua tu ai i le faitotoa o le faato’aga o fugalaau felanulanua’i, ma se ala savali i ona luma o faamalumalu ifo iai lala o olive. Na ia iloa atu se fafine, o ofu papa’e, o savali punou atu i le pogisa, ma ona lima i ona alafau. O Maria le Makatala! Ina ua taunuu atu o ia i le tuugamau, ua pipii atu ia i lona lima, vaai i totonu, toe liliu,

ma savali natinati ese ma le tuugamau.

Pei lava o se miti, ua sosoo atu ma Maria, ia Ioane i lona ofu talaloa, ua vaai i totonu o le tuugamau, pito atu ai Peteru, ua savali atu, ua alu i totonu o le tuugamau, oso atu ai ma Ioane.

Na mou atu i latou uma ia, ae toe tu mai Maria le Makatala, ua nofo ifo ma punou faalagolago i le tuugamau, ma tagi. Na liliu faafuase’i o ia ma na iloa atu Iesu o tu atu. Na ou iloa atu foi Iesu! Ua tootuli ifo nei Maria, ma ona lima ua faaloaloa atu i le Alii, ma vaavaai atu ma loimata i fofoga o le Alii, ma faapea atu: “Raponi e!”

Na ou te’i a’e i le malamalama o le la, oloo ‘u’u lava la’u Tusi Paia. A o tumu pea lo’u mafaufau i vaaiga ou te matua maofa ai e pei o se ata mai se miti, na ou nofo ai loa i lalo, ma tusi vave ne’i galo, ia le solo ua fai nei ma pese. Mulimuli ane ona ou faaopoopoina lea iai ma le musika.

I come to the garden alone,
while the dew is still on the
roses;
and the voice I hear, falling on
my ear, the Son of God dis-
closes.

He speaks, and the sound of His
voice is so sweet the birds hush
their singing; and the melody
that He gave to me, within my
heart is ringing.

I’d stay in the garden with Him,
tho the night around me is fall-
ing; but He bids me go-thru the
voice of woe, His voice to me
is calling.

Pe a oo ina savaliali mai le alofa

masani ona lafo e lo'u tina pe a otegia au. O le isi aso na ona tago mai lava toso atu a'u ma ato i lalo, ma futi lo'u ulu. Ou te manatua foi lo'u ita ina ua nofo ma aumai le isi tamaloa matou nonofo e fai ma ona to'alua, ma o'u tama. Na ou mana'o ai i lo'u tina e fai mai sa na faato'esega e uiga i ia mea na tutupu, ma tago mai e fusi atu au ma sogi mai i mea o lo'u tino na ia sasa a o o'u laitiiti.

Na oo ina ma le iloa le mea

ua oo iai la ma savalivaliga. Ona ou savali ai lea i le isi maga o le ala, ae alu ia i le isi e tau saili poo fea ua ma oo iai. Na ou oo i le tumutumu o le mea maupu'epu'e oneone, ma ou iloa mai ai lo'u tina, ma ou popole ai ne'i pa'u ifo i le omo tele lea ua tu ai i lona augutu. Na nanati la'u valaau iai, "Ia oe i e pa'u! Faatali mai iina." Na ou iloa atu le fefe o lo'u tina, ma ou faavavevave atu ai i le mea o iai. Na ou tamo'e atu ma fusi mai lo'u tina, ma pisa fiafia ai a ma tala i lea taimi., O le faato'a ou toe fusia lea o lo'u tina i ia tausaga ua atoa le 15, talu ona ou alu ese ma le ita mai lo matou aiga, ona o lona ote ma faifai a'u ma fasi.

Na ou tatalo i lea taimi i le Atua e fesoasoani mai ma foa'i mai le loto faamagalalo ia au, ou te faamagaloina ai lo'u tina.

Na ou liliu ma ou vaai mai i lo'u tina, o savali atu i o'u tulagavae. Pei e 'emo se mea ma ou lagona ai, e tatau foi ona ou savali i tulaga'a'ao o le "Alii.

O le mea muamua lava na ou fai ina ua ou taunuu i lo'u fale, o le fai lea o la'u tusi i lo'u tina, ma faamatala iai lo'u alofa ia ia, ma lo'u fiafia i le taimi sa ma faatasi ai. Na tusi mai foi ana tusi ma faatuatusi mai,"Mo La'u Tama'i Tapu!", o le upu alofa, ae le o "Tama'i Tapu", o le upu faifai.

tusia e Lille Diane Greder,

"Aua ne'i ia te i matou, le Alii e, aua ne'i ia te i matou" Sal. 15:1

mai le itulau muamua

Wilberforce) ae avea o ia ma Kerisiano. E le o se mea faigofie lea i lenei taule'ale'a. Aua e ui lava e le se tagata aulelei, e puupuu, e pi'o le isu ma faale-lelei ona mata, ae ese le fiafia iai o tama'ita'i. E tele masina o tauivi o ia ma lona faamoemoe e fia avea o ia ma Kerisiano. Aua na ia mautinoa lelei lava, a filifili o ia e tuuina atu lona ola mo Keriso, e ono sosola ai le toatele o ana uo tama'ita'i, ma ono aafia ai foi lona auai i polokiki.

Ae ua mautu lava i le loto o Viliamu, e fia avea o ia ma Kerisiano. Na te le'i tuua lona tofi faipule o le malo ina ua avea o ia ma Kerisiano, ae na ia faaaogaina mo le finagalo o le Atua. O le amataga la o le Palemene o Peretania i le tau amataga o le senituri 19, na ia

faatuina ai se pili e fautuina ai le soloia o faiga faapologa (slavery), ma faaauau pea lona faatuina o ni pili seia oo lava ina taunuu lona faamoemoe. Ina ua soloia faiga faatau pologa i Egelani, ona ia taumafai foi lea ina ia tafisea i le lalolagi atoa le faatauina o tagata e pei ona faatauina o manu. Fai mai o le tagata lenei e tele lava ina tatala lona finagalo i nisi mea, a o le itu i le faapologaina o tagata, ma mataupu autu faa-Kerisiano, e maumaututu lava lona finagalo e le suia.

O le tausaga e 1807 na soloia ai i Peretania le faatau o tagata e pei ona faatau o povi ma isi manu. E te alu i le maketi oloo faaali ai pologa, tagata uli mai Aferika, e pei ona faaali isi oloa e fia faatauina atu, ma filifili lau tagata e faatau e ave i le fale e fai ma au pologa. O le tausaga e 1833, na

pasia ai le tulafono i le palemene o Peretania ina ia faasaoloto uma ai pologa oloo iai i Peretania.

Sa auai foi Viliamu Uilipafosi i le sosaiete mo le faamamaluina lelei o le Aso Sa mo tapuaiga i le Atua. A o le faamoemoe o lea taumafaiga a Uilipafosi, ina ia a'oa'o leleina ai tamaiti i le faitautusi, tumama, ma mataupu faa-Kerisiano.

Sa fiafia tele Viliamu i Salamo, ma fai ma ana masani le faitau ai i aso uma. Ina ua pasia e le palemene lana pili e soloia ai faiga faapologa ina ua te'a le tele o tausaga o taumafai iai, ona alu ai lea o ia i lona aiga, ma faitau le Salamo e 15:1: "Aua ne'i ia te i matou, le Alii e, aua ne'i ia te i matou..."

O le tagata sa alu lona ola talavou i tama'ita'i, a o lenei ua le toe taulia i lona mafaufau ia mea ina ua tuuina atu lona ola mo Keriso. Na maliu Viliamu Uilipafosi i le aso 29 Iulai 1833.

I le Feagaiga Fou, e tele aoaoga oloo iai e uiga i le faasaolotoina mai o tatou i le nofo pologa i le agasala. ###

O E UA MALILIU

Vaitofiga L. Anesone

15 Tesema 1943-18 Tesema 2013

O le faletua o le tiakono ia Tiatia Lolani Anesone. Sa soifua mai Vaitofiga i Salesatele, Falealili i le aso 15 Tesema 1943. O ona matua o Leota Faalolou Taituuga le tama, ma Fiamalii Leleimalefaga Peu le tina. Na malii Vaitofiga i le aso 18 Tesema 2013 i le maota gasegase i Motootua. Ua 70 tausaga ma aso e tolu le matua o le tina. Na faa'ekalesiaina i le 1960, e o mai ma Tiatia i le 1979 ua uma

o faatiakonoina mai Mulinuu. O i laua o le matafale faavae o lenei aulotu.

O Vaitogi o le sui taitaifono o le Mafutaga a Tina o Alafua. O le tagata e to'aga i lotu ma fonotaga a le Ekalesia. O le tina e ola tapenapena, ma saunia lelei ona la'ei i soo see mea e alu iai, aemaise i sauniga lotu. O ia o le tagata e taofi mau i ona talitonuga, tusa lava poo ua fulisia le aulotu, poo le Mafutaga a Tina i se mea, e faaali lava le tetee, faatoa ioe ai lea mulimuli. O se tina e alofa toe osi aiga. E to'afitu le fanau ma Tiatia Lolani, e to'afa teine ae to'atolu tama. O fanau a le la fanau e to'atolu. O uso o Vai ma ona tuagane e sefulu ma le tasi. E

toatele fanau a'oga mai tua sa nonofo aoga ia i laua i Apia nei.

O le sauniga faale-aiga o le tina ia Vaitofiga na faia i le malumalu EFKS i Alafua i le 5pm afiafi o le Aso Tofi 26 Tesema 2013. Taitai le Susuga i le Toeaina ia Tauaaga Mataafa FT. Lauga le Toeaina ia Siolo Tauati FT. O ona toe sauniga o le aso 27 Tesema 2013 10am i le taeao, o au sa taitai, o le Toeaina ia Faauga Mata'utia FT sa tatalo o le faifeau ia Peteru Seiuli FS na avea i totonu le sa o le tina. O Asalele Lefauaitu FM (faifeau Metotisi) ma le Toeaina ia Kerisiano Soti FT na saunia le upu faamafanafana. Ona faai ai lea i lona nofoaga mau i lona aiga i
faaauau itulau e sosooi

E onomea ona avea Tama'ita'i ma Faifeau?

mai le itulau e 13

faifeau ae alu lana tane e faatino nafa a le fafine? O le a la le ta'u o le tane a le tina lea? O lona uiga ua ta'u loa ia o le faafeagaiga ae ta'u le tamaloa o le faletua. O se tulaga ua suia atoa ai le tofamanino i le saofa'iga a Samoa, ma ua fesuia'i ai nafa a le faifeau ma lona faletua. A taunuu ni malo ona saofai mai lea o le faafeagaiga tamaitai ae tamo'e lona toalua e gasese mai tua. O le a se silasila i le tulaga i le aganuu ma le saofaiga a Samoa? A fai foi toonai i Aso Sa, e onomea ona nofo mai le tamaitai faifeau i le tala e faafeagai ma alii o le nuu ae alu lona toalua i tua aua ua ta'u o ia o le faletua, e nonofo faatasi mai ai ma isi faletua ma tina o le Ekalesia?

Oloo ta'ua i le tusi o Timoteo 2:12: "Aua na ou le tuuina atu i se fafine ia a'oa'o atu, pe pule i lana tane, a ia nofo faalologo o ia." Aisea? Aua na muamua ona fai Atamu e le Atua ona faato'a fai ai lea o Eva lona fesoasoani (f13).

Ua faauuina e le Atua alii latou te pulea aoga faaleagaga i totonu o le lotu ma fai i latou ma faifeau. E le faapea ona ua sili atu le atamai o alii i le mataupu silisili nai lo tamaitai. E leai, ona pau o fuafuaga a le Atua ua uma ona tuulaupua mo le taitaiga o le Ekalesia.

E toatele foi tamaitai ua tuuina iai mealofofa a le Atua latou te folafolaina ai le finagalo o le Atua. Oloo mafai foi ona folafola e tamaitai ma tina le upu a le Atua ia latou lotu e fai i masina taitasi aemaise foi o aso faapitoa e pei o Aso o Tina faapea ma fuifui lotu o le Tausaga Fou. Oloo fai le tele o tina ma faiaoga Aso Sa latou te aoina ai fanau a le Ekalesia i le itu faaleagaga. Latou te molimauina foi le finagalo o le Atua i lotu Au Taumafai ma tatalo i lotu a le Au Leoleo. I le itu i fafo o le galuega, o tina lava le lima taumatau poo le ivitu lea o soo se Ekalesia i ana mea e fai aemaise le itu i fafo o le galuega. A leai

tina e faatamo'eina se galuega i totonu o se Ekalesia, e lelei le taunuuga o lona galuega. Peitai e le avea lona mea e sosopo ai le manuvale i luga o le fogatia, pe feaiaa'i ai le uto ma le maene i le nafa a le alii ua uma ona tofia ai ia e avea ma faifeau.

Ua tele suiga ua fetuleni mai i lenei vai taimi e ao ina tatou mata'itu ma aputiputi a tatou measina faaleagaga. E iai lava suiga e tala feagai ma onomea ma la tatou aganuu ma le saofa'iga a Samoa. Tatou taumafai e soso i le moa o le ala ne'i o tatou toe popoto ane, ua tata i tua o Fatutoa la'i o Puava.

O nai motuga'afa na mo le tatou mafutaga i lenei aso. Tau ia ina ou uia ou lumafale ma 'ou utufia le vai na momoo iai le Tui Atua nai Mulinuu ma Nuuasala. Afai foi ua le tau i le niusina, ona ua pau o se taumafaiga. Ou te talitonu oloo i ina le tofa ma le faautaga e faalava ane ai se oso mo lenei mafutaga. O le a seu i fanua le vaa o Saleutogi. A tuuama le fua tatala le filialii, ia folau i lagima le paia o lenei mafutaga ae ola lo'u nei tagata i le alofa ma le agalelei o le Atua. Soifua ona o Iesu.

Seiuli Vaifou A.Temesa

Vaitofiga L. Anesone

Alafua lava.

O la Iesu, “O a’u nei o le toe tu ma le ola, o le faatuatua mai ia te au, e ui lava ina oti ae ola lava ia.” Faamaise le Agaga o le Atua ia Tiatia ma le fanau ma le paia i aiga.

Tavita Anesone FT.
EFKS Alafua.

Tuilagi Siasosi

27 Novema 1917-10 Novema 2013

O ia o le tina matua o lenei aulotu. O ia foi o le tina tiakono. Na soifua i Safa’i i Savaii i le 27 Novema 1917 ae malii i Alafua 10 Novema 2013 i le 9am i le taeao. Tusa ua 95 tausaga 11 masina ma aso e 14 le matua o lona soifua, toetiiti lava atoa le 96 tausaga o lona soifua.

Sa aulotu muamua i Matafele-fou, ona aulotu mai lea i Alafua i le 1982. Faaekalesiaina i Safa’i 1930, faatiakono i Matafele-fou 1968. O ona matua o Pologa Ua Samuelu le tina, ma Ah Luni le tama, o Lemaveve Su’a Lemaveve le tamafai. O lona toalua o Siasosi Panapa ua leva ona malii. E to’afitu ona uso ae to’atasi lona tuagane. O lana fanau e to’afa, ma lana fanau fai e toatele; e 14 le fanau a lana fanau.

O le tina ia Tuilagi Siasosi o le toe ulutaia, poo le tina matua o lenei aulotu. O se tasi o matafale iloga. O le tagata o le Alii, e fiafia eola ma mafuta i lona Atua i le tele o taimi o lona soifua. E toaga i le lotu, lotu o le Aso Sa, lotu au leoleo, lotu au taumafai, lotu mafutaga a tina. Faatoa le lotu ina ua faataotolia ua tagata matua o ia.

Ua leva ona faataotolia o ia, a o le lelei ia o lona mafaufau ma lana

faaauau itulau e 24

O ATA O E UA MALILIU

Silasila i le itulau e 24

O E UA MALILIU

Tagatanuu I’amanu Talauega 25 Me 1938-19 Fepuari 2014

O Tagatanuu sa tele ina faaaogaina se laau, e tau tootoo ai le toeaina ina ua matua o ia. E fai lea ma fesoasoani ia te ia pe a savali. O lona uiga sa avea lava lea laau poo le tootoo e toomaga iai ma fesoasoani ia te ia. E pei sa faapena foi le soifua galue o lea auuna. Sa peiseai o se tootoo e fesoasoani, ma lagolago iai le aiga, nuu ma le Ekalesia.

Sa faaofia faa-Ekalesia i le aso 27 Iulai 1958. Na faaipoipo I’amanu ma Valea’i i le aso 25 Tesema 1969, ma e sa faapaiaina e le Susuga i le faifeau o Opetai. O I’amanu Talauega na faaee iai le suafa matai o Tagatanuu i le masina o Iuni 1974. Na faaeeina le tofi tiakono ia Tagatanuu ma Valea’i i le aso 1 Iuni 1980. O le tasi lenei o tagata sa fiafia tele e tatalo ma lauga foi i lotu vaeluaga ma lotu talosaga i tausaga taitasi. O se tama matua e faagalogata ona uiga loto maualalo, agamalu ma le filemu.

I le ma taunuu mai i Malaemalu, o Tagatanuu sa tau’aveina le tofi failautusi a le aulotu. Sa tofia foi o ia e fai ma Komiti o le Taulaga. Ina ua oo i le taimi e tataua ona toe fai ai filifiliga o tofi, na tula’i mai se isi tiakono ma saunoa: “Tagatanuu, poo le a le finagalo o le Atua ia te oe, a ia e tauaveina lenei tofi failautusi se’ia oo i le oti.” Ma e pei o le faaiuga ma le ioega lava lena sa finagalo autasi iai le matou aulotu. E foi mai le ma malologa mo le tolu masina i le 2011, ua faata’otolia Tagatanuu i le gasegase o le *stroke*. Ia, amata mai lava i le taimi lena, e ui i le faigata ae sa taumafai lava Tagatanuu e faatino pea ona tiute faafailautusi. E tu lava ma lona

tootoo ma faalagolago i le laulau Faamanatuga e fai mai ai ana folafolaga. Na oo lava ina faigata ia te ia ona auai mai i le lotu i Aso Sa. Na oo lava ina fautua mai nisi o le aulotu, ia faamalolo le toeaina mai lona tofi aua ua feagai pea o ia ma ma’i. Ae sa ou naunau lava e tuuai pea lea tofiga taua i le toeaina atonu e aoga e faagaioi ai pea lona tino ma le mafaufau, pe te’i ua toe fo’i ai o ia i lona malosi sa iai. Ma e sa ou talanoa ia Tagatanuu i lea tulaga. Na tagi le toeaina e manao e faaauau pea e lona tausua ia Ruta le la tofi failautusi. Ma e sa faapena lava ona fai. Mai lava ia Aokuso 2011 seia oo ia Iulai 2012. Ua lava foi le suafa matai a Tagatanuu tatou te iloa ai, o se tama sa ola tautua ma galue malosi, mo lona aiga. Ae o se tootoo sa avea foi ma tiakono, poo le poutu toa sa fesoasoani ma lagolago malosi i le galuega a le Atua. O Tagatanuu foi e le o se tootoo e fia nofonofo pe ta’oto ma malolo, ae naunau o ia i le fia ola galue ma tautua pea. Ai poo le mea lea sa taliagata ai i lona mafaufau, o lona gasegase pei ona sa feagai ma ia.

O ona toe sauniga lotu, sa faia i le aso 1 Mati 2014. O le Susuga i le faifeau o Vavatau Taufao FS, sa faaulufaleina le sa o le auuna. O le Susuga i le A’oa’o ia Mose sa faitauina le Tusi Paia. O le Susuga i le faifeau o Reupena Leau, sa saunia talosaga. A o le Susuga i le faifeau o Masunu Utumapu na saunia le upu faamafanafana.

O Tagatanuu o ia lava o le sa avea ma tootoo, e lagolago malosi i le galuega a le Atua. O la le fai Salamo: “Aua o oe ta te faatasi ma a’u, o lau laau ma lou tootoo e faamafanafanaina ai a’u.” O upu faamafanafana a le Leoleo Mamoe Lelei: “Ia outou o mai ia te a’u, o outou uma o e tigaina ma mafatia i avega, o a’u fo’i e malolo ai outou.”

Rev. Faaletaua Faaea,
EFKS Malaemalu, Falealili.

O E UA MALILIU

Talefaia Liumaunu Seuamuli Faatonu

29 Tesema 1929 - 9 Novema 2013

O le tina matua sa fai ma faletua o le tiakono a o le 2003 na valaau ai le Alii ia Liumaunu Seuamuli Faatonu.

Sa soifua mai Talefaia i le aso 29 Tesema 1929, ae na valaau lona Matai mo ia i le aso 9 Novema 2013. Ua 84 ai tausaga o lona soifua. O ona matua o Leota Lu I le tama, o Avao, a o Silia Tutagaalevao Laloifi o Magiagi le tina. Sa faaipoipo ia Liumaunu Seuamuli Faatonu Vaaelua. O le fanau e to'a 12, ma o e na tutupu mai i lenei tina, e 109.

O lona toe sauniga sa faia lea i le malumalu i Tanoalei'a Vaivase Uta. O a'u sa taitai i lona toe sauniga, o Tanoalei'a Tunupopo A'oa'o Malua, sa momoli maia le sa o le tina. O Julius Fruean A'oa'o Malua sa faitauina le Tusi Paia, a o le Susuga ia Silupe Siaki, o le faafeagaiga a Sato'alepai na saunia le tatalo. O Siolo Tauati F.T. na saunia le upu faamafanafana mo fanau ma le aiga, ma le Ekalesia. O le faifeau ia Kereta Faatonu, sa na faia le molimau e fai ma sui o le fanau, ma aiga. O au na saunia le molimau faaleagaga o le tina.

E moni e mulimuli mai le alofa ma le agalelei i aso uma o lou ola, ou te nofo foi i le fale o le Alii, e faavavau lava. O se tina ua leva ona faata'otolia i ma'i, e agamalie, alofa ma faatuatua.

Ona faaii ai lea i lona oliolisaga tumau i lona aiga i Vaivase Uta lava. O le pese faatofa a le auuso, Talofa uso e, tofaina oe. Tofa Talefaia. Manuia lau malaga.

Enefatu Lesa FS - Tanoalei'a.

Tia'i Leatigaga

23 Aperila 1934 - 27 Novema 2013

Na soifua mai le tina i le aso 23 Aperila 1934 peitai na faamanavaina e le Atua ana feau i le aso 27 Novema 2013 ina ua 79 tausaga o le soifua. O ona toe sauniga sa faia lava i lana Ekalesia sa tautua ai i tausaga e tele o le soifua, Ekalesia EFKS i Laulii.

Oloo maua i faamauga i le

galuega o le tausaga e 1950 na faaipoipo ai i le tama o le aiga ia Leatigaga Faaafu. O le tausaga e 1978 na malaga mai ai ma le tama ma lo la tofi tiakono mai i Salelologa i Savaii ma faaaogaina ai loa i le Ekalesia i Laulii nei. O le tausaga e 1988 na faamanuiaina ai le taumafai o le tama i le suega A'oa'o Fesoasoani ma faaauau ai le tautua i le Atua e ala i lenei Ekalesia seia oo ina valaau le Atua i le tama i le 2003.

O le aso 25 Ianuari 2004 na faaeeitia ai le tofi tiakono i le tina lenei ia Tia'i Leatigaga, ma o le molimau o le ulai tiakono tina lea i lenei aulotu. O ia lava na asaina le vao filifili i lea foi vaega o le tautua ma ua to'a fa isi tina ua o latou seei mai ma fai ma tiakono. Ua loa lava foi ona tautua i le tapenaina o le faamanatuga a le aulotu i Aso Sa muamua o masina taitasi ma isi aso faapitoa. Na ia faia lea galuega a o avefa ma faletua o le A'oa'o Fesoasoani, ae na ia tatalo mai lava foi ina ua fai lona tofi tiakono mo le faaauauina o lea auunaga. O se mea faigaluega aoga a le Atua lea lava tina e ala i lenei aulotu, e le'i 'alo lava foi le tautua, ma faapa'ole ona fai, ae sa faia lava ma le faamaoni. E ui lava foi ua fai ifo lona malosi ae na te le'i faafitia lava foi le faiva o le tiakono e ala i le tautuina o le faamanatuga, aua o le masina o Oketopa o lona masina mulimuli lea na tautu ai ae valaau loa le Atua ia te ia ia Novema. Ua loa ona tautua i le Ekalesia e ala i le Komiti o le Sene a le Ekalesia ma o ia lava sa tele ina tauaaoina le foai a le Ekalesia i Aso Sa taitasi faatasi ai ma isi tiakono tina.

O se tina osi aiga, o le molimau lea a Luamanuvae Poe o le matai o lona aiga mai Salelologa i Savaii, e nofo lava i Laulii ae alu atu lava i Savaii e fai le tele o faalavelave o lona aiga. O le molimau lava foi lea a le Afioga i le Tiakono ia Tuailii Tavita na fai ma sui o le aiga o lana fanau i Laulii, sa pei lava o ia le ulu o le aiga aua na te faia uma tonu ae faale-gagana lava le tama o le aiga. O Luamanu Taumulu na fai ma sui o le fanau, ma o lana molimau o se tina e 'ote ae afifi ai lona alofa ina ia manuia lana fanau.

O meaalofo aoga ia, sa o matou molimauina faatasi ma lana fanau ma lona aiga i ona toe sauniga. O le Susuga i le Toeaina o le Ekalesia Faapotopotoga a le Atua na faia le upu

faamafanafana, ae o au lava na taitai ma faaauauina ona toe sauniga i lona oliolisaga tumau, ma matou faatofa atu ai i le pese faatofa a le Au Kerisiano.

Tofa tina! Ia manuia lau malaga.

Pita Tole'afua

EFKS Laulii

Fuimaono Tuitagaalevao Fagalilo Tagaloo Salamo Fiatala Petaia

17 Aokuso 1934 - 13 Aokuso 2013

Na soifua mai Fuimaono ia Aokuso 17 1934 ae tuumalo ia Aokuso 13 2013, toe fa lava aso atoa lona 82 tausaga. O tuua o Fuimaono, o lona tama o Rev. Telefasa Fiatala Tuatagaloa Petaia, a o lona tina o Lumaavaolii Fuimaono Tuiletufuga Nio Leasuasua.

Na faaipoipo atu Fuimaono ia F a a m e l e a K a t e r i n a Faalanuoma'ave'ave Vaifale. Na foaiina ia i la'ua se fanau e to'a 11, e to'alima tama, ae ono teine. O le la fanau fai e toatasi. O le aofai o fanau o fanau a Fuimaono ma Faamelea e 26, a o fanau a fanau a le la fanau e 17. Lona uiga e to'a 54 i latou na tutupu mai ia Fuimaono ma Faamelea. O Fuimaono ma Faamelea ma le fanau, o le tasi lea aiga na amataina le aulotu ua igoa nei ia Apia-Uta i Vaivase Uta. Ua faaigoa lenei aulotu ia Apia-Uta, aua o le toatele o i latou na amataina, e o mai i le talafatai o Apia, ae ua maua fanua faatau mai le malo ma see mai loa i uta ma nonofo ai. O se aulotu na amata i le ausage ma le to'agaogao.

O le galuega a Fuimaono o le fai eletise, ma o le galuega lea sa tautua ai ona matua ina ua mapu mai i le galuega faa-faifeau tautua nuu, ma fai mai, o le galuega foi lea sa fesoasoani i le faaaogaina o ona tuafafine ma ona uso. O Fuimaono sa gafa ma le vaaia o fale o le galuega i Apia-uta, i mea tau eletise a o maua lona malosi.

Ma te taunuu mai i Apia-Uta i le 1985, oloo saunia e Fuimaono ma Faamelea le faamanatuga i taimi uma lava e faatino ai lenei sauniga paia. E saunia uma le areto ma le uaina, o ipu ma fata, e oo lava i sefe e teu lelei ai mea o le faamanatuga. Oloo faaauau e le fanau ma a latou fanau lenei auunaga e oo mai lava i le taimi nei.

faaauau itulau e sosoo ai

O E UA MALILIU

Fuimaono Tuitagaalevao Fagalilo Tagaloa Salamo Fiatala Petaia

O le tasi lenei aiga e valaauina lava le faifeau mo se faigalotu i soo se mea e fai i le aiga, e talosaga foi i le faifeau ina ia talosia nisi o le aiga oloo i totonu o vaega'au a Amerika. Na amata mai lava i le 60 tausaga o le soifua o Fuimaono, e mana'o e fai se lotu i ona aso fanau uma seia oo mai lava i lona 81 tausaga. Fai mai a ia, e ao ina faafetaia le Atua ona o lana tausiga ia te ia i lea tausaga ma lea tausaga. E le taua ni meaai, ae taua le faafetai. O le isi lenei aiga o le matou aulotu, ou te le manatua pe ua iai se Aso Sa e galo ai sa matou suavai, ma e oo mai lava i le aso oloo faapea ona fai e le fanau.

Faato'a le nofoia nei lava e Fuimaono lona nofoaga i le aufaipese ina ua faaletonu lana faalogo, ae ua ulusina lava i le aufaipese. O se tama e lotu i Aso Sa uma, faatoa le vaaia

lava Fuimaono i le falesa, ina ua malaga pe gasegase foi. O Fuimaono e le se tama e sii soo, ae tapa lava e le aulotu sona finagalo. E lava lava le auai o Fuimaono i mea e fai o le galuega, e fai ma faamalosi-au, ma faalototele i le aulotu. O le tumalo o Fuimaono, o le maluu muamua lea ua faia i le matou falesa faatoa tolu masina talu ona faaulufaleina. Ae ua fetau foi, aua o le isi lenei tama e naunau ia vave maua sona laki lapo'a ae se'i ona faia se matou falesa.

Na tumalo Fuimaono i le Aso Lua 13 Aokuso ae faia ona toe sauniga i le Aso Toonai 17, e atoa tonu iai le 82 o ona tausaga. Na aveese mai le tino maluu o Fuimaono mai le maota o Letoa Sefo Pa'u, i le itula e ono i le taeao ma molimoli atu ai i lona aiga i Apia ma mapu ai i ni itula ma sauni ai mo ona toe sauniga i lona lava aso i le itula e 12.

O le sauniga i le fale maluu sa ou faia le upu faamafanafana, ae tatalo Asi Tuisalega o le faifeau Metotisi, ae ina ua taunuu i Apia, sa faia e Enefatu Lesa FS le tatalo. O ona toe sauniga i le malumalu i Apia-Uta sa taitaia e le

Pulega a Apia Sasae. Sa faaulufale le tino maluu e Moli Moli FS, na faitauina e Fuifui Teevale FS le Tusi Paia; na saunia e Elisaia Kolia FS talosaga, a o le lauga na saunia e Komiti o Feaueseese Tuuau FS. Sa ou taitaia lona toe sauniga. O e na faia le molimau o Fuimaono, Tuiletufuga Le Mamea Ropati Mualia (matai o le aiga); Vaifale Peti Williams (tuagane o Faamelea); Fauono Ni'o Salamo (uso o Fuimaono); Ile Seuli (tuafafine o Fuimaono); Lemalu Tuaoitau A. Pupi (alo teine o Fuimaono); Fauono Dominic Chan Mow (sui o fanau a le fanau a Fuimaono).

Na faaii ona toe sauniga i le tuugamau i le lagiina o le pese faatofa a le Au Kerisiano: "Talofa Uso e, Tofaina oe." O le fuaitau sa fai ma mamanu i le aso o Fuimaono: "O LE ALOFA O LE ATUA, E LE FAIAINA LONA TAUNUUGA."

Manuia lau malaga Fuimaono, faafetai mo mea uma na e faia ona o le suafa o le Alii.

Siolo S. Tauati FT,
EFKS Apia-Uta.

Gogouli Maiava Pelesa Leota

23 Novema 1921-20 Tesema 2013

Na soifua mai le tina tiakono i le aso 23 Novema 1921 ae goto le la o lona soifua i le aso 20 Tesema 2013 i le itula e 12 i le aoauli. E faamanavaina e le Atua ana galuega ua tusa ma le 92 tausaga o lona soifua.

O se tina e valaau mai le Atua ua le atoa lana faalogo, aemaise ai le avea o lana vaai, a o tulaga ia sa le'i avea ma faalavelave i le fia mafuta ma le fia auai i sauniga ma tapua'iga i Aso Sa taitasi. E fetosoa'i lava e nai ona alo i lana nofoa faataavalevale pe a malaga mai i tapua'iga. Se'iloga lava ua aafia i ni ma'i ma le atoa ai lona malosi, ona faatoa misi lea o sana lotu. O lana pese masani lava e fiafia iai o le "E! le alofa o Iesu!", - Pese 73 - na ia usuina lea pese i lana Aso o Tina mulimuli i le 2013. E maluu le tina ua 33 tausaga talu

ona galue faa-tiakono, ma o se tofi sa ia tau'ave ma le faaeteete ma le faamaoni.

Sa faia lona sauniga faale-aiga i le malumalu o lana Ekalesia sa galue ai - EFKS Utualii ma Tufulele i le afiafi o le Aso Faraile, 27 Tesema, a o lona sauniga faamavae sa faia i le Aso Toonai 28 Tesema i le itula e 10 i le taeao. O au lava sa ta'ita'i i lea sauniga, sa faaulufaleina lona sa e le Susuga Tupou Tanielu, faafeagaiga o le EFKS Nofaalii, oloo galue A'oa'o Fesoasoani ai se tasi o alo o le tina tiakono. O tatalo sa saunia e Rev. Pala Tolai, o le Ta'ita'i Matagaluega Metotisi i Tufulele, a o le Tusi Paia na faitauina e Siaifoi Kelekolio o le Fesoasoani Katoliko i Tufulele lava.

Sa faatumulia toe sauniga o le tina i fanau ma aiga, aemaise o le auai foi o nisi o faiaoga o le Kolisi Faafaifeau i Malua, ona oloo faai'uso ai se tasi o alo o lenei tina tautua. O nisi nei o pine faamau, a o faamanuiaga o lona

soifua tautua, ua filifilia ai nisi o lana fanau e fai ma avefeau o le Tala Lelei.

Na faaiuina ona toe sauniga i loa oliolisaga tumau i lona aiga i Utualii lava.

Ia faamaise le Agaga o le Atua i fanau ma aiga - ae ia maua se nofoaga mau o le tinai le malo o le Tama oi le lagi. Manuia le malaga Gogouli...

Faraimo Tiitii FS.,
EFKS Utualii.

**The
Human Body
Inside you are
some 100,000 miles
of nerve fibres
along which mes-
sages zip at speeds
of 300 miles per
hour**


O ATA O E UA MALILIU




Tia'i Leatigaga



**Tagatanuu
I'amanu Talauega**



**Gogouli Maiava
Pelesa Leota**



**Talefaia Liumaunu
Seuamuli Faatonu**

mai le itulau e 21

Tuilagi Siasosi

talanoa mai, pe a ou asiasi iai. E talanoa mai lava o ia o mea faalelotu, ma poo a mai le aulotu; poo o mai lana fanau ma fai mea



**Vaitofiga L.
Anesone**

“Talofa uso e, tofaina oe.”

Le auaua lelei e ma le faamaoni, na e faamaoni i nai mea iti, ou te tofia oe e pule i mea e tele, ulufale maia i le fiafia o lou Alii.”

Faamaise le Atua i le fanau ma le paia o aiga, ona o le to’esea o le tina matua.

Tavita Anesone FT,
EFKS Alafua.

FAITH

**Faith is confidently
expecting miracles from
the Source and
Promiser of miracles.**